

Xujun xi tjun kits'inkjihí nda postru Pabło xuta ninku Corinto

B'i ts'ín kikjaniñaha Pabło xuta ninku xi tjín nanki Corinto

1 An Pabło, Ntíaná kits'ín mana nku nda postruhu^a Jesucristo at'aha b'a ts'ín kama mjehe. An ko nda nts'eé Sostene² tísuniñaihi jun xuta ninkuhu Ntíaná xi tintsu_{boo} nanki Corinto. Cristo Jesu kits'ín nga Ntíaná kikj'áts'enuu. Kinchjanuu nga kjuáts'enuu xi nkú ta kits'ínko ngatentee xuta xi tu má xi tje_{hén} ni s'ejihin Nda Ntíaná Jesucristo. Kui xi Nda Ntíaná ko ta Nda Ntíaha xuta xu'bo.

³Kas'enuu kjuanda ko kjuajyu xi tsjáná Ntía Na'miná ko Nda Ntíaná Jesucristo.

B'i ts'ín tsjáha Pabło máb'achjihí Ntíaná nk'ie nga f'áítsjehen xi nkú ts'ín nda kits'ínkoho Ntíaná xuta ninku Corinto

⁴Tehente tsjaha máb'achjí Ntíaná nga f'áítsjenna jun, at'aha kisakúnuu kjuandaha Ntíaná. Cristo Jesu kits'ín nga kisakúnuu kui niu. ⁵Kits'ín nga kin'ekjóhooon ngayje tíkjá kjuanchiná xi tsjá Ntíaná. Kui kjuanchinóo xi nkú ts'ín tjíhin nga chubo ko xi nkú ts'ín tjíhin nga kamankjinnuu ni xi ts'e Ntíaná. ⁶B'a ts'ín kis'ejña chjihi ajinnuu nga kjuaxi én nda tsuhu Cristo xi kis'enijmínuu.

⁷Kui nga najmi ndyjat'ahanuu ndaha nku kjuanda xi tsjá Ntíaná nk'ie nga tíchuyóhoo nistjin nga kuakúchji yjoho Nda Ntíaná Jesucristo. ⁸Ko ndjá ts'ínkinchánuu Ntíaná santaha nistjin xi fekuu, tu xi najmi tjín ni xi n'enijéhenuu nistjin nk'ie nga kjuá ngáha Nda Ntíaná Jesucristo. ⁹Ts'íntjusun Ntíaná ni xi tsu. Kui xi kinchjanuu nga nkuhú kamakoo Ntíhi, kui xi Nda Ntíaná Jesucristo.

B'i ts'ín tsakúya Pabło nk'ie nga najmi nda tjín tsa najmi nkuhú k'ua xinkjín xuta ninku

¹⁰Jun já nts'e, ngajoho Nda Ntíaná Jesucristo b'a tíxinnuu nga nkuhú ni xi chubo ko nkuhú ch'oo xinkiu. Nkuhú kas'eyanuu ko

^a 1:1 “Xi kis'exá” tsuhu ra “nda postru” ko a ra “já postru”.

nkuhú ni xi n'oo. ¹¹B'a tǐxian, já nts'e, at'aha xinkjǐn Kloe kitsúyana nga kjuachán rú tjǐn ajinnuu. ¹²Tjǐn rú ajinnuu xi: “An tjennkia Pablo”, tǐncha tsu rú. Kō rú tjǐn ngá xi: “An tjennkia Apolo”, tǐncha tsu rú. Kō ta tjǐn rú ngá xi: “An tjennkia Pedro”, tǐncha tsu rú. Kō ta tjǐn rú ngá kj'ái xi: “An tjennkia Cristo”, tǐncha tsu rú.

¹³Nga chasehe raá, ¿a tsakǎnyahá yjohō Cristo? ¿A Pablohó kis'et'a kruu ngandanuu? ¿A Pablohó kikj'áts'enuu nk'ie nga kisaténtó? ¹⁴Tsjaha máb'achjǐhi Ntǐaná nga najmi tjǐn ajinnuu xi an tsatentá, nku tutuhú Krispo kō Gayo. ¹⁵B'a ts'ín najmi ch'a xi b'a kuǐtsuhu tsa an kikj'ats'an.

¹⁶Ta tsatentá xinkjǐn nda Estefana. Najmi ta f'áítsjehenna tsa tjǐn sa kj'ái xi tsatentá. ¹⁷At'aha najmi kui xá xi kitsjána Cristo, tsa xuta kuatentá. Nk'ie ní k'uenijmǐá én nda tsuhu, kui ní xáha xi kitsjána. Kō najmi én nanka ts'inchjén nga nchja, tu xi najmi nku én tiya kamaha ngabayaha Cristo t'a kruu.

**B'ǐ ts'ín tsakúya Pablo nk'ie nga ajihǐn ni
xi kits'ín Cristo kis'ejǎna chji nga'yúhun
kō kjuankjintak'uhun Ntǐaná**

¹⁸Én xi s'enijmǐ ngat'a ts'e xi nkú ts'ín k'ien Cristo t'a kruu, kui xi tu a éhén maha xuta xi tǐndyja. Tunga máha ná xi kin'ek'ankiná, nga'yúhun Ntǐaná maná kui éen. ¹⁹At'aha b'ǐ tǐtsu Ntǐaná má nga tjǐt'a xujun:

Ts'inndyja kjuankjintak'uhun já xi nanka ts'innkjink'un.

Ts'inndyjajian xi nkú ts'ín ts'innkjink'un já nkjink'uun.

²⁰¿Yá nda xi nanka ts'innkjink'un? ¿Yá nda xi tu xí mahá ra xujun? ¿Yá nda xi maha nchjanijmǐyaha ni xi tjǐn asunntei? Tu a nihí kits'ín ma Ntǐaná kjuankjintak'un nanka xi tjǐn asunntee. ²¹At'aha ajin kjuankjintak'un nankaha Ntǐaná y'énda nga najmi kjuankjintak'un xi tjǐhǐn xuta skuēkohō ra. Kama mje níhi nga xuta xi s'ejihǐn én xi tǐs'enijmǐú, nga kui xi ts'ínk'anki, én xi tu a éhén maha xuta.

²²Xuta xi ntje judio tjeheh ra mjehe skuē kjuankjúhun Ntǐaná, kō xi najmi ntje judio tjeheh ra mjehe kuasínñuju nku kjuankjink'un nanka. ²³Tunga jin, nga kis'et'a kruu Cristo tǐb'enijmǐ. Kui nii xi najmi sasǐhǐn xuta xi ntje judio tjeheh ra kō tu a éhén maha xuta xi najmi ntje judio tjeheh ra.

²⁴Tunga máha xuta xi Ntǐaná kinchjaha nga kjuáts'e, ndaha tsa xi ntje judio tjeheh ra kō ta ndaha tsa xi najmi ntje judio tjeheh ra, kui xi ts'ínkjǐhǐn nga ajihǐn Cristo tsakúchji Ntǐaná nga'yúhun kō kjuankjintak'uhun. ²⁵At'aha ni xi y'énda Ntǐaná xi tu a nihí maha xuta, 'yún tjǐn saha sin nk'ie nga ni xi ts'innkjink'un xuta. Kō má b'a maha xuta nga ts'innkjink'un nga najmi tjǐhǐn nga'yún Ntǐaná, yo ní 'yún bakúchji nga'yúhun nga nga'yún xi tjǐhǐn xuta.

²⁶Jun já nts'e, n'ekj'áitsjon xi nkú ts'ín kinchjanuu Ntíaná nga kjuáts'enuu. Najmi nkjin mahanu xi yaha nga nkjink'un. Najmi nkjin mahanu xi já k'aku. Najmi nkjin mahanu xi nk'a tjoon. ²⁷Tunga xi tu a xutahá maha xuta, kui xi j'ájin Ntíaná tu xi tsjáha ra kjuasuba já nkjink'uun. Ko j'ájin xuta xi najmi chumi ni chjǎhi ra nginkun xuta tu xi tsjáha ra kjuasuba já xi nk'a tjen. ²⁸Ta j'ájin xuta xi najmi b'achjǎhi ra xuta ko xi najmi nda tí'mihǎ. Ta j'ájin santaha ni xi najmi kjee tjín tu xi kjéxihin ni xi ja tjín. ²⁹B'a kits'ín Ntíaná tu xi najmi ch'a nk'a kama k'uasjehe yjoho nginkun.

³⁰Tunga nkuhú kits'ín makonuu Ntíaná Cristo Jesu ko kits'ín nga Cristo tsichu ma kjuankjintak'unná. Ngat'aha ni xi kits'ín Cristo naxu tsichu maá nginkun Ntíaná, kikj'áts'ená ko y'échjǎntjai jéná. ³¹Kui b'a maha, xi nkú ts'ín tjít'a éhen Ntíaná: “Xi nk'a k'uasje yjoho, ngat'aha ní ni xi kits'ínkoho Ntíaná, kui ní ngat'aha nga nk'a kat'asjehe yjoho.”

B'ǎ ts'ín kits'ínkjáitsjehen Pablo xuta nǐnku Corinto xi nkú ts'ín y'énjímǎhi én nda tsuhu Cristo

2 Já nts'e, nk'ie nga tsichuk'ienjímǎnuu én xi Ntíaná tǐb'éjǎa chji nd'ǎi, najmi én tsjo tsu kits'inchjén ko tsa én xi nanka. ²Najmi kama mjena tsa kj'ǎi nihi kinchja ajinnuu. Nku tutuhú Jesucristo kinchjanjímǎya ko á kruu k'ient'áha.

³Nk'ie nga tsátejǎajinnuu najmi nda chánka kamana yjona. Tǐtsankjun níná ko xǐ tǐb'atsénkjúnna. ⁴Ko nk'ie nga y'enjímǎnuu ko tsakuyánuu éhen Ntíaná, najmi kits'inchjén én nkjink'un xi s'ejihǎn xuta. Espirituhu ní Ntíaná ko nga'yúhun Ntíaná y'ejǎa chjikohona ni xi kinchja, ⁵tu xi s'ejihǎnnuu Ntíaná xi tjǎhǎn nga'yún, najmi kjuankjink'uhun xuta.

B'ǎ ts'ín tsakúya Pablo nk'ie nga Espirituhu Ntíaná xi y'éjǎa chjiná kjuankjink'uhun Ntíaná

⁶Tunga ajihǎn ní xuta xi ja tsichu mankjihǎn ni xi ts'e Ntíaná kjuankjink'un n'echjéin nk'ie nga chubakoi. Najmi kjuankjink'un xi ts'inchjén xuta n'echjéin nga chubai, ko ta ndaha najmi kjuankjink'un xi ts'inchjén já xi batéxuma n'echjéin, já xi ndyja ndyjun nkini. ⁷Nk'ie ní bakuyǎi éhen Ntíaná, chubanjímǎyai ni xi kits'ínkjink'un Ntíaná nga y'éjǎa 'ma. Kui niu xi y'énda Ntíaná kintehe ni nga kits'ínnda asuntee. B'a kits'ín tu xi s'ehená kjuachánka. ⁸Ndaha nku xi batéxuma asuntei najmi kamankjihǎn kjuankjintak'un xu'bi. At'aha tsa kamankjihǎn niu, najmi kingjǎt'a kruu ra Nda Ntíaná xi tjǎhǎn kjuachánka.

⁹Tunga b'ahá kama xi nkú ts'ín tjít'a éhen Ntíaná:
Ni xi najmi kkie xuta ko najmi kint'é,
xi ndahachǐ najmi kjee n'enkjǎnk'un,

kui nihi xi Ntǐaná y'énda títjun,
ngandaha xuta xi incha tjoho Ntǐaná.

¹⁰Espirítuhu Ntǐaná y'éjǐna chjǐná ni xi y'énda títjun Ntǐaná. At'aha Espirituhu Ntǐaná be sisin ngayjee ni xi tǐín ko santaha ni xi 'yún nankaha Ntǐaná. ¹¹At'aha, ¿yá xi be xi nkú ts'ín ts'ínnkjink'un xuta xi kj'ái? Nku tutuhú xuta xu'bo xi be xi nkú ts'ín ts'ínnkjink'un. B'a tǐ ts'ín najmi ch'a be xi nkú ts'ín ts'ínnkjink'un Ntǐaná. Nku tutuhú Espirituhu Ntǐaná be xi nkú ts'ín ts'ínnkjink'un.

¹²Ngat'a ts'aǎná bi, nginkun Ntǐaná nibáha Espiritu xi kin'ekjǐhǐn, najmi asuntei ts'e. Ntǐaná kitsjáná Espirituhu tu xi kamankjihinná kjuanda xi kitsjáná. ¹³Kui niu xi chubai nk'ie nga bakuyái. Najmi n'echjéin én xi bitjuhu kjuankjink'uhun xuta. Kjuankjink'un xi bitju níhi Espirituhu Ntǐaná n'echjéin. B'a ts'ín 'miyaha rǐ xuta xi tǐjǐnjihǐn Espirituhu Ntǐaná ni xi ts'e Espiritu.

¹⁴Xuta xi najmi tǐjǐnjihǐn Espirituhu Ntǐaná najmi ts'ínkjǐhǐn ni xi ts'e Espiritu, at'aha tu a nihí maha. Najmi tǐjǐn nkú ts'ín kama kamankjihǐn ra, at'aha nku tutuhú Espirituhu Ntǐaná b'éjǐna chji niu. ¹⁵Xi tǐjǐnjihǐn Espirituhu Ntǐaná, kui xi mankjihǐn ni xi tǐjǐn. Tunga xuta xi k'o'o najmi mankjihǐn á kj'ái ts'ín ts'ínnkjink'uhun xuta xi tǐjǐnjihǐn Espirituhu Ntǐaná.

¹⁶At'aha b'ǐ ts'ín tǐjǐ'a éhen Ntǐaná:

¿Yá xi be xi nkú ts'ín ts'ínnkjink'un Ntǐaná?

¿Yá xi tsǐanjíyáha?

Tunga ná bi, n'enkjǐnk'aán xi nkúhu Cristo at'aha Espirituhu Ntǐaná tǐjǐnjinná.

B'ǐ ts'ín kitsúya Pablo xá xi kikanéhe ko xá xi kikanéhe Apolo ajihǐn xuta nǐnku Corinto

3 Jun já nts'e, najmi kama kinchjakonuu xi nkú ts'ín nchjaka xuta xi tǐjǐnjihǐn Espirituhu Ntǐaná. Kinchjako nínuu xi nkú ts'ín nchjaka xuta xi asuntee tjehe ra, xi nkúhu xuta xi as'ái kuakatuts'ihǐn ra nga kuakak'já éhen Cristo. ²Kintehe ni nga ni xi ndjá kuakuyánuu, tu ni xi najmi ndjáhá tsakuyánuu. At'aha b'a k'un ntí xihí k'un, ntí xi tu ntáchikihí 'bi, xi najmi ma kjine ni xi ndjá. Ko santaha nd'ái najmi kjee tǐjǐndanuu yjonuu tsa kamankjinnuu ni xi nanka tǐjǐn.

³Asuntee y'a sanuu. Nk'ie nga tǐjǐn sa ajinnuu kjuanchǐni ko kjuachán, ¿a najmi asunteehe y'ahanuu? ¿A najmi b'áhá ts'ín tintsuoo xi nkú ts'ín tǐjǐntu xuta asuntee? ⁴At'aha tǐjǐn xi: “An tjennkia Pablo”, tǐtsu ko tǐjǐn ngá xi: “An tjennkia Apolo”, tǐtsu. Nk'ie nga b'a tǐn'o, ¿a najmi b'áhá tǐn'o xi nkú ts'ín xuta xi najmi be Ntǐaná, xi najmi tǐjǐnjihǐn Espirituhu Ntǐaná?

⁵¿Yáha Pablo? ¿Yáha Apolo? Tu já musuhú niu xi Ntǐaná kits'ínchjéhe tu xi s'ejihǐnnuu. Nga nkúnkúj kin'eǐ xá xi kitsjánǐ

Ntǐaná. ⁶Xi nkúhu tsa an y'entje yá tuu ko Apolo kikuhun, tunga Ntǐanáhá xi kits'ín nga kisá yoo. ⁷Kui b'a maha, najmi xi b'entje yoo ko ta ndaha xi kuhun, tsa kui xi chánka. Nku tutuhú Ntǐaná xi kits'ín nga kisá yoo, kui xi chánka. ⁸Xi b'entje ko xi kuhun yoo tu nku chubahá. S'echǐhi nga nkúnkú xi nkú ts'ín kits'ínxá. ⁹Nga nkúnkú makoǐ xinkǐ nga tǐn'exát'aihi Ntǐaná. Jun xi nkú joyaha jǎná xi ts'e Ntǐaná xi jin tǐn'exǎjǐin.

Jun xi nkú joyaha ni'yaha Ntǐaná. ¹⁰Xi nkú ts'ín tǐjǎ kjuandaha Ntǐaná xi kitsjána, an xi kama nda maestru chjǐnexjó xi kingjǎjǎ tuts'in ni'yoo. Ko kj'ái ngá xi tǐincha kjesintjen xjóho ni'yoo nd'ai, tunga ndaha ts'ín kats'ínnkjink'un nga nkúnkú xi nkú ts'ín ngjuǎindjuko xjó. ¹¹At'aha Jesucristo, kui xi tuts'in xjóho ni'yoo. Najmi ma s'eǐna sa kj'ái tuts'in xjó nga xi ja kjǐjǐoo.

¹²Asun tuts'in ni'yoo kama chjúsintjen xjó xi kamandakoho toonsine, ko a ra toontaba, ko a ra ndjio tsjo k'un, ko a ra yáte, ko a ra ndji, ko a ra xka. ¹³S'eǐna chji xá xi kits'ín nga nkúnkú xuta nǐstjin nga kuasehe Ntǐaná ni xi kits'ín xuta. At'aha nd'í xi kj'uaǐ kui nǐstjǐun k'uéjǎ chji xi nkú k'un xá xi kits'ín nga nkúnkú xuta. ¹⁴Xi kits'ínnda xjó xi kuichúkjuaha nd'íu, kui xi ts'íínkjǎihǐn chjǐhi. ¹⁵Tunga xi kits'ínnda xjó xi k'uétihi nd'íu, kui xi ndyja ni xi kits'ín, ndaha tsa tu kui kuankihí xi nkú maha xi nd'í bitujǐin.

¹⁶¿A najmi yanú nga jun xi nǐnkuhu Ntǐaná ko nga Espirituhu Ntǐaná tǐjǎajǐnnuu? ¹⁷Tsa tǐjǎ xi ts'íínkatsún nǐnkuhu Ntǐaná, Ntǐaná ts'íínkje xi b'a ts'ííun. At'aha tsje nǐnkuhu Ntǐaná, ko jun bi, jun xi nǐnkuhu Ntǐaná.

¹⁸Najmi tu ch'a k'uaqachaha yjoho. Tsa tǐjǎ ajǐnnuu xi b'a maha nga kui xi nkjink'un xi nkúhu já nkjink'un xi tǐjǎ asuntee, tu sa ní nku nda xi najmi chumi nihi xi maha kats'ín ma yjoho, tu xi b'a ts'ín kuichú ma kjuaxǐhi nku xi nkjink'un. ¹⁹At'aha kjuankjink'un xi tǐjǎ asuntee, kui xi tu a nihí nginkun Ntǐaná. At'aha b'ǐ ts'ín tǐjt'a éhen Ntǐaná: “Ntǐaná ts'ín nga ta kuihi kjuamañaha já nkjink'uun jnejin.” ²⁰Ko b'ǐ ta ts'ín tǐjt'a ya: “Ntǐaná be nga tu a nihí ni xi ts'íínkjink'un já nkjink'uun.”

²¹Kui b'a maha, najmi tu ch'a nk'a k'uasjehe yjoho ngat'aha yá xi tjennki. Jun kich'o ngayjee ni xi tǐjǎ. ²²Pablo, Apolo ko Pedro, asuntee, kjuatǐk'uun ko ngabayoo, ni xi tíma ko ni xi kama, ngayjee niu jun kich'o. ²³Cristo y'anuu, ko Ntǐaná y'aha Cristo.

B'ǐ ts'ín kitsúya Pablo nkú tǐhǐn ra xáha já postru

4 Kui b'a maha, já xi ts'ínxát'aha ra Cristo katumanuu jin nga chasenǐ, já xi kik'ai xáha nga kuakúya ni xi y'éjǎ 'ma Ntǐaná nǐstjin nk'ie ko mjehe nga k'uéjǎ chji nd'ai. ²Yahá nga xi 'bǎihǐ nku xá binchihǐ nga kixǐ ngjuǎikó xáha. ³An bi najmi kjintahana tsa

chasohō mí nihi xi nda kō tsa najmi nda títs'ian kō tsa nku nda jue xi b'q ts'ǐn. Tā ndaha an najmi be xi nkú ts'ín ts'innisihǐ rā yjonā tsa mí nihi.

⁴Nda tjíya kjuānkjintak'unna tūnga najmi kuihǐ niu tsuhu rā tsa najmi tjenna. At'aha Ntǐanáhá xi basehe ni xi ts'ian. ⁵Kui nga najmi tū chasehe ruu yá xi nda títs'ín kō yá xi najmi nda títs'ín kintehe ni nga kj'uaí Nda Ntǐaná. At'aha kuihǐ xi kuakúchji ni xi tǐjǎa 'ma má jyuun kō k'uéjǎa chji xi nkú ts'ín tǐjntuyá animaha xuta. Kui nǐstjiun Ntǐaná nda ts'ín kuinchjane xuta xi nkú ts'ín kanéhe nga nkúnkú.

⁶Jun já nts'e, Apolo kō yjonā kuanchjanímíyahana tū xi chahanu nga najmi tjǐhin nga kuítjǎtihuū xi nkú ts'ín tǐt'a. Kui nga najmi tū chánka katumahanū yjonū ngat'aha xi tjennkiu kō as'ai najmi n'echjǐhi ruu xinkuu. ⁷At'aha, ¿yá xi b'q títsu nga ji xi 'yún nda sai qjihin xuta xingisoo? Ngayjee ni xi tjǐhin tū kik'aihǐri. Nk'ie nga tū kik'aihǐ ri ni xi tjǐhin, ¿á chubā chánkahá tǐn'esjeheni yjohǐ, xi nkúhu tsa najmi tū kik'aihǐ ri ni xi tjǐhin?

⁸Jun ja tǐjnnūu ngayjee ni xi mjenuū. Ja kama nchinó. Ja tsichumo xi nkú joyaha já rei xi najmi tā machjéhen rā jin. Mjena tsa já rei kjuaxǐ kamo kai, tū xi b'q ts'ín kō jin sakút'ahanǐ xánūu nga tā kuatexumai. ⁹At'aha b'q mana nga jin xi tǐ'minǐ já postrū Ntǐaná kitsjǎnte nga kamaǐ xi nkúhu já xi finijé, xi tǐjn nga n'ek'ien. Ntǐtsjee kō xuta tǐbe ni xi tǐmat'ain. ¹⁰Jin xi xuta chinǐ tǐ'minǐ at'aha Cristo n'exát'aihǐ, kō jun xi xuta nkjink'un kamo nga kis'ejinnūu Cristo. Jin xi najmi tǐjnnǐ nga'yún, jun xi tǐjnnūu nga'yún. Jun nda ts'ín ts'ínkjǎinnūu xuta, jin ch'on ts'ín ts'ínkjǎinnǐ.

¹¹Santaha nǐstjin nd'ai kjintjǎa tǐyǐ kō santaha ni xi s'ǐ najmi tǐsakúnǐ. Najmi tǐjnnǐ najyun, tǐbich'onjinnǐ kō chubā tinimasún ní. ¹²Jin kjinenǐ yjonǐ. Ch'on tsunǐ xuta, tūnga binchintjǎa ní xi b'q tsunǐ tū xi Ntǐaná nda ts'ínkōhō rā, ndaha tsa b'q títsunǐ. Tjennki unkienǐ xuta, tūnga n'e chúkjuā ní. ¹³Ch'on ts'ín nchjayanenǐ xuta, tūnga én ndahá n'ek'óyǐhǐ xi b'q tsunǐ. Ja tsichu maǐ xi nkúhu stjé qjihin xuta asuntee, xi nkúhu ni xi najmi chumi ni chjǐhǐ rā. B'q tǐmat'ain santaha nǐstjin nd'ai.

¹⁴Najmi tǐb'et'ánūu ni xu'bi tsa tū xi tsjahanūu kjuasuba. Tǐb'et'á níná ni xu'bi tū xi títsjaníyáhanūu jun xi ntǐnǐ xi tjona. ¹⁵At'aha ndaha tsa s'enūu te mǐi xi kuakúyanūu éhen Cristo, tūnga najmi nkjihín nǐ'mǐ xi s'enūu. An tsichu ma xi nkúhu tsa nǐ'minūu nga y'eníjmínūu én nda tsuhu Cristo Jesu, kui xi kits'ínk'íéntu tǐk'unūu.

¹⁶Kui b'q maha, tǐbankihǐnūu nga chase chubayahanú tū xi b'q tā n'ehenu. ¹⁷Kui kjuaha nga títs'ínkjǐsehenūu Timoteo, xi tā kik'áts'ehe Nda Ntǐaná. Kui xi xi nkú joyaha ntǐnǐ xi tjona, xi ma 'yún k'an. Ts'ínkjǎítjennūu xi nkú títs'ian nga títs'inxát'aha Cristo Jesu, xi nkú ts'ín bakuyá ngayjee nǐnku xi tǐjn tū má xi tǐjén ni.

¹⁸Tjín xi chubá tǐbasin tǐtjuhún ajinnuu at'ahá b'a tǐtsu nga najmi kǐfnsenuu. ¹⁹Tunga tsa Ntǐaná mjehe, kǐfnsé xatǐnuu ko skue najmi tu nkú tǐtsu jóo. Tǎ skue nkú tu nk'a xáha xi b'a tǐncha tsu. ²⁰Nk'ie nga Ntǐaná batéxumaha xuta, ni xi ts'ín xuto bakúchji nga Ntǐaná batéxumaha, najmi ni xi tsu. ²¹¿Má nihi xi mjenuu? ¿A nk'ie nga kǐfnsenuu, ndjá ts'inkonuu? ¿A ra tu sahá kjuatjo kǐfinkonuu ko nǐmaqjua kuasenuu?

B'ǐ ts'ín tsasehe Pablo kjuaha nda xi tǐnjǎjihin xuta nǐnku Corinto

5 Kjuaxi nga tǐnu'yá nga tǐnjǎjinnuu nku xi tǎ kuihi najúhun tǐnjǎko, ni xi tǎ santaha xuta xi najmi be Ntǐaná najmi ts'ín. ²¿Nkú ts'ín nga tsjo tǐmahǎnuu xi nkú ts'ín tǐfi nǐnku? ¿A najmi tǐjǐhín ni nga k'úé babanuu ngat'ahá ni xi tǐmoo ko najmi tǎ k'uaǐntehe ruu nga k'úéjǎjinnuu nda xi b'a tǐts'ínun?

³Ndaha tsa kǐjin tǐjǎnanuu tunga animǎnahá tǐntsubǎjiun. Kui nga b'a mahana xi nkúhu tsa tǐjǎjinnuu. Ko xi nkúhu tsa tǐjǎjinnuu, ja b'a kixian nga najmi nda tjín ni xi tǐts'ín ndo. ⁴Nk'ie nga kama ñjakú xi nkúhu tsa an kúátejǎjinnuu ko tǎ k'úéjǎjinnuu nga'yúhun Nda Ntǐaná Jesu, ngajoho Nda Ntǐaná Jesu ⁵n'ekjas'ohoon ndanindoo nda xi b'a tǐts'ínun. B'a ts'ín katatsuhun yjoninte ngatitsuhun tu xi n'ek'ankihi animǎha ndo nǐstjin nga kǐ'uaǐ ngáha Nda Ntǐaná Jesu.

⁶Ngat'a ts'e xi nkú ts'ín tǐntsuboo, ¿nkú ts'ín nga tsjo tǐmahǎnuu nk'ie nga tǐn'ekjóhoo nda xi b'a tǐts'ínun? ¿A najmi yanú nga kutin na'yu san ts'ínsanyje na'yu nǐnkuon? ⁷Ngatitsuhun ndo, kui xi nkú joyaha na'yu san. Tǐts'ínkatsúnnuu ngatitsuhun. Chjúxiun ndo xi nkú tǎ ts'ín xuta xi ntjehe judio tǐjehen ra nga kǐjexín na'yu soon kintehe ni nga k'uasje S'í Pascua. At'ahá Cristo ja k'ienttǎjái ngandaná, kui xi chutsankaha S'í Pascuaná ko jun xi nkú joyaha na'yu tsetse xi najmi tǎ tǐjǐhín ra na'yu san. ⁸Kui b'a maha, n'esjekohóná S'íu nǐnkuǎn xi najmi tǐjǐhín na'yu san. Kui xi tsuhu ra nga najmi tǎ kas'ejǎjinná kjuangak'un ko kjuach'onk'un. Tu sa ní je kas'eyaná ko naxu.

⁹Xujun xi ja kits'inkjǐnuu b'a kixinnuu nga najmi tu n'engujinkoo yjonuu xuta xi fantuko jminchjǐn nga najmi kǐje bixan. ¹⁰Tunga najmi xuta xi najmi behé Ntǐaná kinchǎjihín nga b'a kixian. Tǎ ndaha xi 'yún mjehe toon, tǎ ndaha xi ts'ín ndyjé, ko tǎ ndaha xi ts'ínstjoho ntǐa xi ntsja xuta ts'ínndaha. At'ahá tsa najmi kuǐntsubǎjihun xuta xi b'a ts'ínun, tǐjǐhín ni nga kuǐtju ei asuntee ma. ¹¹Nk'ie nga kits'inntúnuu, b'a kixinnuu nga najmi tu n'engujinkoo yjonuu xi chubá já nts'eé ts'ín ma yjoho tunga jminchjǐhín fantuko ngá, ko tsa xi 'yún mjehe toon, ko tsa xi ts'ínstjoho ntǐa xi ntsja xuta ts'ínndaha, ko tsa xi nchǎ én ch'on tsu, ko tsa xi ma ch'ǐ, ko tsa xi ndyjé ts'ín. Xi chubá já nts'ehé ts'ín ma yjoho tunga b'ahá ts'ín ngá, santaha nǐnu najmi tu chineko.

¹²At'ahq an najmi tje'henna nga kuasehe tsa tje'hen jé ko tsa najmi tje'hen jé xuta xi najmi nînkû nchjahq ra. Tunga máha jun, ¿a najmi tji'hín ni nga chasohó ni xi tíma aya nînkû? ¹³Kui nga tiyú tjennkihinu nda ngatitsuun. Xuta xi najmi nînkû nchjahq ra bi, Ntíaná tje'hen ra nga kuasehe tsa tje'hen jé ko tsa najmi tje'hen jé.

**B'i ts'ín tsakúya Pabló xi nkú ts'ín tjíhin
nga s'enda nku kjuasti ajihîn xuta nînkû**

6 Tsa kjuasti sakúko'ho xinkjín já nts'eé, ¿á ma k'un fisehe ra já jue xi najmi benkjúhun Ntíaná tu xi k'úendaha kjuaha, antehe ni nga xuta xi s'ejihîn Ntíaná nguaisehe ra? ²¿A najmi yanú nga xuta xi s'ejihîn Ntíaná kuasehe ni xi nda ko tsa xi najmi nda xi kits'ín xuta xi tjín asuntee ndyjun nkinî? Tsa jun xi b'a n'oo, ¿nkú ts'ín najmi kamanuu k'úendahanu nku ni xi najmi 'ni tjín? ³¿A najmi yanú nga ta santaha ntítsjee chaseéhe mí nihi xi kits'ín? Kui nga tjíhin nga kamahaná k'úendaá kjuasti xi sakúná asuntei.

⁴Kui nga tsa tín'ekokjuahanu xinkju ngat'ahq kjuasti xi tjín asuntei, ¿á já xi najmi yankjúhun ajihîn xuta nînkû t'bankísehe ruu nga k'úendaha kjuanuu? ⁵B'a tíxinnuu tu xi kama subahanuu. ¿A najmi tjíhin ajinnuu nku xi nkjink'un, xi kamahq k'úenda kjuq xi tjínko'ho xinkjín já nts'eé? ⁶Tu sa ní nginkun já xi najmi s'ejihîn Ntíaná tíincha ts'ínkokjua xinkjín já nts'eé.

⁷Nga ta juhun tjínkonuu kjuasti xinkju tsuhu ra nga ja tíndyjajinnuu. ¿Á najmi tu sahá tín'e chúkjuahanu ni xi najmi b'a tjín xi tín'enuu? ¿Á najmi tu sahá tí'baintehenu nga n'ehenuu ndyjé? ⁸Tunga ta juhún ni tín'o ni xi najmi b'a tjín ko ndyjé. Najmi xuta xi kj'ai xi b'a tín'ohó. Já nts'ehé ní xi b'a tín'ohó.

⁹¿A najmi yanú nga xuta xi najmi naxu ts'ín nginkun Ntíaná, kui xi najmi kama kjuas'enjin nga Ntíaná kuatéxumaha? Najmi tu ch'anachóho yjonuu. Xi fantuko jminchjín nga najmi kjeé bixan, xi ts'íntsjohó ntia xi ntsja xuta ts'ínndaha, xi najmi benkjún kjuabixahan, já no ya, ¹⁰xi ts'ín ndyjé, xi 'yún mjehe toon, xi ma ch'i, xi ch'on ts'ín nchjane xuta, ko xi b'anachaha xuta nga kje'áha ni xi tjíhin, ngayjee xi b'a ts'ín najmi kama kjuas'enjin nga Ntíaná kuatéxumaha. ¹¹Kui ni xu'bi kits'ín k'ua xi tjín ajinnuu nistjin nk'ie, tunga nd'ai ja kisanéjnunuu. Ntíaná ja kikj'áts'enuu. Ja naxu tsichumo nginkun Ntíaná ngat'ahq ni xi kits'ín Nda Ntíaná Jesucristo ko ngat'ahq Espirituhú Ntíaná.

**B'i ts'ín tsakúya Pabló nk'ie nga
Ntíaná ts'e yjonintená**

¹²“Ma ts'ian tu mí nihí ni”, tsu xuta. B'a tjín, tunga najmi ngandanáá ngatentee niu. Ndaha tsa ma ts'ian tu mí nihí ni, tunga

najmi tsjantéhé ra tsa tjín nku ni xi kjé'yúnna nga ts'íints'ena.

¹³“Nichinee kants'á tjeheh ra ko kants'á tjeheh ra nichinee”, tsu xuta ko b'a tjín kjáihin, tunga Ntǎnáná ts'íínkatsún nga joo niu. Najmi kui xáha yjonintená tsa tu chuba súnntukonáá xinkjá. Tíjña ní tu xi Nda Ntǎnáná kama ts'ehe ko tu xi ts'íihin xáha Nda Ntǎnáná. ¹⁴At'aha nga'yúhún Ntǎnáná kits'ínkj'áiyakoho Nda Ntǎnáná ngabayoo, ko ná bi, nga'yúhún ta ts'íínkj'áiyakoná ngabayoo.

¹⁵¿A najmi yanú nga nku te nǎnku nga nkúnkú jun ko nga nǎnku kui xi yjonintehe Cristo? ¿A nda tjín tsa nku te nǎnkuhu Cristo kamangujinko nku naská? Najmi. Ndaha tsa mí yjehe. ¹⁶¿A najmi yanú nga xi ts'ínko nku naská, kui xi nkuhú bichú mako yjonintehe naskóo? At'aha b'i ts'ín tjít'a éhen Ntǎnáná: “Nkuhú yjoninte kuichú ma nga joo.” ¹⁷Tunga xi nkuhú ts'ín mako yjoho Nda Ntǎnáná, kui xi nkuhú bichú mako Espirituhu Nda Ntǎnáná.

¹⁸Kui nga tiyú t'axíhin ruu ngayje tíkjá ni xi ts'ín nga chuba fantukohó xinkjín xuta. Tu má ngatitsuhún ni xi ts'ín xuta najmi fas'enjin yjonintehe, tunga xi chuba fantukohó xinkjín, kui xi ts'ín nku ngatitsun xi ts'ín chuntí yjonintehe. ¹⁹¿A najmi yanú nga yjonintenuu xi nǎnkuhu Espiritu Santo xi tíjñajinnuu, Espiritu xi kitsjánuu Ntǎnáná? Najmi ta ts'ajuhunnu yjonuu. ²⁰At'aha kis'echjintjainuu nga kich'atsenuu. Kui nga chankjúnkohonu yjonintenuu Ntǎnáná.

B'i ts'ín tsakúya Pablo ngat'a ts'e nga k'úéntuko xinkjín xuta

7 Kuinchjako ma ngánuu nd'ai ngat'aha ni xi kichasjaiyanú nga kin'e nibánu xujun. Nda tjín tsa nku nda najmi kuixan. ²Tunga tu ngat'aha ní nga ma mjehe nga chuba kjúántukohó xinkjín xuta, kui nga tu sahá kat'entukoho chjuún jáx'iun ko nga jminchjún kas'ehe x'in. ³Xi tí'mi x'in najmi tu kat'échoho yjoho chjuúhún nga kjúájñako, ko xi tí'mi chjuún najmi tu kat'échoho yjoho x'íihin nga kjúájñako. ⁴At'aha xi tí'mi chjuún najmi ta kui batéxuma subaha ra yjoho. Ko ní x'íihin batéxumaha yjoho. B'a ta tjín ts'e xi tí'mi x'in. Najmi ta kui batéxuma subaha ra yjoho. Ko ní chjuúhún batéxumaha yjoho. ⁵Najmi tu b'ech'óhoo yjonuu xinkiu, nku tutuhú tsa tse mjenuu chubakoo Ntǎnáná. Tunga t'endako tíjtunnú xinkiu tu xi tu chubahá nǎstjin najmi chjúngajnuhunu xinkiu, askahan chjúngajnu ngáhanu xinkiu. At'aha tsa najmi chjúngajnu xinkiu, kjút'ayák'unnuu ndanindoó nk'ie nga najmi kama 'yúhunnuu.

⁶Tíb'ejñá ndáinu tsa b'a n'oo. Najmi kjua'yún títs'ihinnuu kui nii. ⁷Mjena kai tsa ngatentee xuta k'úéntu suba xi nkúhu an, tunga kj'ai kj'aihí kjuanda xi kitsjáná Ntǎnáná nga nkúnkáá. Najmi tu nku chuba kjuanda xi kik'ainá.

⁸Ngat'a ts'e xi najmi kjee bixan ko jminchín xi ja k'ien x'ihin, b'a tíxian nga nda tjín tsa k'úentu suba xi nkúhu an. ⁹Tunga tsa najmi kama 'yúhün nk'ie nga mjehe nga chjúngajnu, tu sahá incha katixan. At'aha tu sahá nda tjín nga kuixan tsa ch'on ts'ín kuinchja animaha.

¹⁰Ngat'a ts'e xi ja tsixan títsjaha kjuatéxuma xu'bi, kjuatéxuma xi najmi an ts'an, xi Nda Ntíaná ts'e. Xi tí'mi chjuún najmi tu kat'éjña x'ihin. ¹¹Tunga tsa ni xi tíb'éjñaha x'ihin, najmi ta katixahan ko tsa kanchjakonda ngáha. Ko xi tí'mi x'in najmi tu kat'éjña chjuúhün.

¹²Ngat'a ts'e xi tjíntuko xinkjín nga s'ejihin ko xi najmi s'ejihin Ntíaná, an xi b'a tíxihin, najmi Nda Ntíaná xi b'a ts'ín tíbatéxumaha. Tsa nku nda nts'eé tíjñaha chjuún xi najmi s'ejihin Ntíaná ko tsa yuhu chjuúhün nga k'úéjñakoho, najmi tu kat'éjña. ¹³Ko tsa nku tachjuún tíjñaha x'in xi najmi s'ejihin Ntíaná ko tsa yuhu x'ihin nga k'úéjñakoho, najmi tu kat'éjña. ¹⁴At'aha nda xi tí'mi x'in xi najmi s'ejihin Ntíaná, fát's'ehe Ntíaná tu ngat'aha chjuúhün xi s'ejihin. Ko tachjuún xi najmi s'ejihin Ntíaná, fát's'ehe Ntíaná tu ngat'aha x'ihin xi s'ejihin. Tsa najmi b'a maha niu, najmi je ntíhi nginkün Ntíaná. Tunga nd'ai Ntíaná ja ts'e ntíhi.

¹⁵Tunga tsa xi najmi s'ejihin Ntíaná mjehe k'úéjña xi s'ejihin, tsa x'ihin ko tsa chjuúhün maha, najmi tjíhin kjua'yún nda nts'eé ko a ra nichjaá nga k'úéjñako xi najmi s'ejihin Ntíaná. At'aha Ntíaná mjehe nga s'ená kjuajyu nga kuíntsubaá. ¹⁶At'aha, ¿nkú n'e yahani ji xi tí'mihi chjuún tsa kuíjneihí x'ihin? ¿Ko nkú n'e yahani ji xi tí'mihi x'in tsa kuíjneihí chjífhin?

B'i ts'ín tsakúya Pablo nk'ie nga ja játs'ená Ntíaná, kui xi 'yún chjîhi ra

¹⁷Tunga tjíhin ni nga kat'entu nga nkúnku xuta xi nkú ts'ín kitsjáha Ntíaná ko kat'entu xi nkú ts'ín tjíntu nk'ie nga Ntíaná kinchjaha nga kjuáts'ehe. Kui kjuatéxuma xu'bi xi tsjaha ngayjee xuta ninku. ¹⁸Xi Ntíaná kikj'áts'ehe nk'ie nga ja kin'ehe ni circumcision, najmi tu katjántaha ra yjoho. Ko xi Ntíaná kikj'áts'ehe nk'ie nga najmi kjee n'ehe ni circumcision, najmi tu kats'ín ni circumcision. ¹⁹Najmi chumi ni ts'íhín tsa kin'ená ko tsa najmi kin'ená ni circumcision. Nk'iehe nga n'etjusaán kjuatéxumaha Ntíaná, kuihí xi chjîhi ra.

²⁰Kat'entu saha nga nkúnku xuta xi nkú ts'ín tjíntu nk'ie nga Ntíaná kinchjaha nga kjuáts'ehe. ²¹Tsa ja tsaténahi jóo nk'ie nga kikj'áts'ehi Ntíaná, najmi tu fantaha ri yjohi. Tunga tsa tísakú niyáhi nga kama ndáhi yjohi, b'a n'ei. ²²At'aha xi kich'ats'e nk'ie nga Ntíaná kikj'áts'ehe, kui xi ja ndáhi yjoho nginkün Nda Ntíaná. B'a ta tjín ts'e xi ndáhi yjoho nk'ie nga Ntíaná kikj'áts'ehe. Kui xi xuta musuhu Cristo nd'ai. ²³Tse chjî xi kis'echjî nga kich'atsenuu,

kui nga najmi tu xuta musuhu xuta n'e mahanu yjonuu. ²⁴Kui b'a maha, ja nts'e, xi nku ts'in tintsuboo nk'ie nga Ntiana kitsuyanuu nga kjuats'enuu, b'a ts'in tintsuba sahanu nginkun Ntiana.

**B'i ts'in basehe Pablo ngat'a ts'e tsa
kuixan xuta ninku ko tsa najmi**

²⁵Ngat'a ts'e xi tjina xunku najmi tjinna nku kjuatexuma xi kitsja Nda Ntiana xi tsaha. Tunga xinyahanuu xi nku ts'in ts'innkjihin k'an. At'aha Ntiana tsase nimana nga kits'in mana nku xi ma n'e sejihin ni xi tsu. ²⁶B'a mana nga nda tjin nga kat'entu saha xuta xi nku nga ts'in tjintu tu ngat'aha kjuanima xi tjin nd'ai.

²⁷¿A tjinahi chjuun? Najmi tu binchisjai niyai xi nku ts'in k'uejna. ¿A najmi jihin chjuun? Najmi tu binchisjai niyai nga kuixain. ²⁸Tsa tibixain, najmi ngatitsun tin'ei. Ko tsa nku takjin xunku tibixan, najmi ngatitsun tits'in. Tunga xi kuixan sehe kjuasti xi tjin asuntee. An bi, najmi mjena tsa kujtajiun kui niu.

²⁹Jun ja nts'e, ni xu'bi xi mjena xinuu. Tu chubaha nistjin tjina sa. Kui nga nistjin xi ndyja saha, xi jihin chjuun kats'in xi nkuhu tsa najmi jihin. ³⁰Xi tintata kats'in xi nkuhu tsa najmi tintata. Xi tsjo jihin kats'in xi nkuhu tsa najmi tsjo jihin. Xi tib'atse tsa mi nihi, kats'in xi nkuhu tsa najmi kui ts'e niu. ³¹Ko xi tits'inchjen tsa mi nihi, kats'in xi nkuhu tsa najmi kui niu xi 'yun chji. At'aha ndyja asunte xi tyaa nd'ai.

³²Mjena nga najmi kjuantaha ruu yjonuu. Xi tjina xunku, kui xi ni xi ts'e Nda Ntiana fantaha ra yoho ko xi nku ts'in ts'in ni xi tsjoho Nda Ntiana. ³³Tunga xi tjina chjuun, ni xi tjin kui xi fantaha ra yoho ko xi nku ts'in ts'in ni xi tsjoho chjuuhun. ³⁴B'a ts'in najmi nkuhu ni xi kjintaha ra. Nku tachjuun xi najmi jihin x'in ko a ra takjin xi tjina xunku, kui xi fantaha ra yoho ni xi ts'e Nda Ntiana ko xi nku ts'in kama je yonintehe ko animaha. Tunga tachjuun xi tjina x'in, ni xi tjin kui xi fantaha ra yoho ko xi nku ts'in ts'in ni xi tsjoho x'ihin.

³⁵Ngandanuu b'a tixihinnuu. Najmi mjena tsa ch'a ts'ink'anjinuu. Mje nina nga nda n'e kuintsuboo ko nekjas'en sisihun yjonuu Nda Ntiana.

³⁶Tsa tjin xi b'a maha nga najmi tits'intjusunko ni xi y'endako takjin xi ja tjindakoho, ko tsa ja tif'a nuhu takjin ko b'a maha nga tu saha nda tjin nga kuixanko, kats'in xi nku ts'in tima mjehe. Katixan. Najmi ngatitsun niu. ³⁷Tunga xi tjinkuhu k'un nga najmi kuixan ko chukjuaha ts'in jnenta yoho nga chjuun ma mjehe, ko ma 'yuhun nga bech'oho yoho, ko ja kits'innkjink'un sisin nga tu saha nda tjin nga najmi kuixan, nda tjin nga najmi kuixan. ³⁸Kui b'a maha, xi kuixankoho xi tjindakoho, nda ts'in. Tunga 'yun nda tjin sa ni xi ts'in xi najmi kuixan.

³⁹Nku tachjuún xi tǵñahá x'ín, kui xi tǵt'a'yúngo x'ihín nk'ie nga tǵñá sa. Tunga tsa kuayá x'ihín, kama ndáí ngáha ra yjoho ko kama k'úéjñako ngáha xi mjehe, tsa nku xi ta s'ejihín Ntǵaná k'úéjñako. ⁴⁰Tunga b'ahá xian nga 'yún nda ts'ín k'úéjñá tsa najmi ta k'úéjñakoho x'ín. B'a ts'ín ts'innkj'ihín k'an ko ndzjen mana nga ta tǵñajinna Espirituhu Ntǵaná nga b'a tǵxian.

**B'i ts'ín tsakúya Pablo ngat'a ts'e nichine
xi chje 'b'aihí ntǵa xi ntsja xuta ts'ínnda**

8 Kuinchjako ma ngánuu nd'ái ngat'a ts'e nichine xi chje 'b'aihí ntǵa xi ntsja xuta ts'ínnda. Ja yaá nkú tǵhín ra ngat'a ts'e kui nii. Tunga ni xi be xuta, kui xi ts'ín ngak'uhún. Kjuatjoo bi, kui xi tsjá nga'yúhún xuta. ²Xi b'a maha nga be tsa mí nihi, kui xi najmi kjeé be xi nkú ts'ín tǵhín nga skue. ³Tunga xi tjoho Ntǵaná bi, Ntǵaná be yáha xuta xu'bo.

⁴Kui b'a maha, ngat'a ts'e tsa ma chine nichine xi chje kik'aihí ntǵa xi ntsja xuta kits'índaha, yaá nga ntǵa xu'bo najmi chumi ni chj'ihí ra ko nga nku tutuhú maha Ntǵaná. Najmi tǵín sa kj'ái. ⁵Kjuaxí nga tǵín nk'a ján ko 'anankiu xi ntǵa tsuhu xuta, ko santaha nkjin maha xi 'mi ntǵa ko nkjin maha xi chubá yankjúhún. ⁶Ná bi, nku tutuhú maha Ntǵaná. Kui xi Ntǵa Nq'miu xi kits'ínnda ngayjee ni xi tǵín ko at'ahá mjehe kui nga tintsuháhaná. Ko ta nku tutuhú maha Nda Ntǵaná, kui xi Jesucristo xi ngat'ahá tǵhín ni xi tǵín ko xi ngat'ahá tintsuháhaná.

⁷Tunga najmi ngatenteehé xuta be ni xu'bi. Tǵín xi ja kama nkaha ntǵa xi ntsja xuta ts'índaha. Tsa xuta xu'bo kjine nichine xi chje kik'aihí ntǵo, tu sa b'ahá tsu ngá kjuankjintak'uhún nga ja chuntí kama nginkun Ntǵaná, at'ahá najmi ndjá tǵíya kjuankjintak'uhún. ⁸Kjuaxí nga najmi ngat'ahá ni xi chineé binchúk'un tǵñahá Ntǵaná. Najmi 'yún nda kama saá tsa chineé ko najmi 'yún ch'onk'un kama saá tsa najmi chineé.

⁹Tǵñá ndáínuu ni xi ma chino, tunga chasenú nga ni xi chino najmi ts'índyjjihín xuta xi najmi ndjá tǵíncha. ¹⁰At'ahá tsa nku xi najmi ndjá tǵíya kjuankjintak'uhún skuehi ji xi ja yai ni xu'bi nga kabinchin nku ante má yankjún ntǵa xi ntsja xuta kits'índaha ko nga tǵhinei ni xi tǵín yo, ¿a najmi kohó kui kama k'un kjine ni xi chje kik'aihí ra ntǵa xu'bo? ¹¹B'a ts'ín ngat'ahá ni xi yai ndyjaha nda nts'eé xu'bi xi najmi ndjá sǵñá, xi Cristo k'ienntǵáhi.

¹²Nk'ie nga b'a ts'ín tǵn'ekatsúnjiun kjuankjintak'uhún já nts'eé xi najmi ndjá tǵíncha, ngatitsun xi tǵífi kontraha já nts'eé tǵn'o ko ta xi tǵífi kontraha Cristo. ¹³Kui b'a maha, tsa ngat'ahá nichinena tǵts'inkijnejihinna ngatitsun nda nts'eé, tu sahá ndaha nku nǵstjin najmi ta kǵínehena yjo, tu xi b'a ts'ín najmi ts'inkijnejihinna ngatitsun nda nts'eé.

**B'i ts'ín tsasinntjai yjohō Pablo
nga kjuaxi nga nda postru**

9 ¿A najmi kamahá ts'ian ni xi ts'ín nku nda postru? ¿A najmi nda postruná? ¿A najmi tunkáhán kikiékohona Nda Ntíaná Jesu? ¿A najmi juhún nga chjihí xá xi títs'ian nga Nda Ntíaná títs'in xáha? ²Ta ndaha tsa tjín xi najmi ts'ínkjáíhín nga an xi nku nda postru, tunga jun tjíhín nga n'ekjáínnú. At'ahá nd'ai nk'ie nga s'ejinnuu Nda Ntíaná, kui niu xi bakúchji nga kjuaxi nga an xi nku nda postru.

³B'i ts'ín básintja yjona nginkun xuta xi b'aya xána. ⁴¿A najmi kamahá n'ekjáíhín an kō Bernabe ni xi chinej kō ni xi s'i? ⁵¿A najmi kamahá nga s'ejñani chjuún xi s'ejihín Ntíaná, xi tsjénkoní nga kuinimai xi nkú incha ts'ín já postru xingisoo kō já nts'e Nda Ntíaná kō Pedro? ⁶¿A tu nkuhú an kō Bernabe tjíhinni nga n'exái tu xi sakúhuni ni xi machjénni?

⁷Nku nda jun, ¿a kuihí b'échjí ni xi fet'ahá nga ts'ín xáha? Xi b'éntje tuntsjajé, ¿a najmi kjinehé tuu? Xi kunntá chutsanka, ¿a najmi yohó sakút'ahá ni xi kjíne? ⁸¿A kjuankjintak'un ts'ahán tíb'asjéhena ni xi tíxian? ¿A najmi b'ahá ta ts'ín tjít'a kjuatéxumoo? ⁹At'ahá b'a ts'ín y'é't'a Moise xujun kjuatéxumoo: “Najmi tu tsa b'e'ohoo turu tsa tu xi najmi kjinehe tuniñu nk'ie nga títs'ínxá nga títbitjá tuniñu.” ¿A turuhú kjintaha ra Ntíaná? ¹⁰¿A najmi ngandanáhá b'a kitsú? Johon, ngandaná b'a ts'ín kis'et'aha kjuatéxumoo. At'ahá xi bakján t'anankiu kō xi bitjá tuniñu, kui xi tjíhín nga kúyahá nga ta sakút'ahá chon.

¹¹Kui kjuaha, tsa jin tíb'entjeheni ajinnuu ni xi ts'e Ntíaná, ¿a tsehé ni xi túbínchii tsa ta sakút'aní chuba chahan ni xi tjínnuu ei asunntei? ¹²Tsa k'jáí ma sakút'ahá ni xi tjínnuu, ¿a najmi 'yúhún tsuhuni nga sakút'aní ni xi tjínnuu? Kamaní kuínchí, tunga najmi b'ahá tín'ej. Ni xi n'e ní, n'e chúkjuai ngayjee ni xi mat'ain tu xi najmi chumi ni k'u'éch'ohō ra xuta én nda tsuhu Cristo.

¹³¿A najmi yanú nga xi ts'ínxá ninku kjine ni xi masún ninku kō xi ts'ínxát'a nqachan chje ta sakút'ahá yjohō chu xi n'ek'ien yo? ¹⁴B'a ta ts'ín y'énda Ntíaná nga xi b'énijmí én nda tsuhu, én xi k'uénijmí k'úéntuhu. Yo sakúhu ra ni xi kjíne.

¹⁵Tunga an ndahachí najmi títbankia ni xi tjíhín nga kanéna kai. Kō ta ndaha najmi títs'inntúnuu tsa tu xi ni k'uaihinú. Tu sa ní nda tjín tsa kuayá kintehe ni nga tu nku k'uaihína ni, at'ahá tsjo tjínna nga najmi chumi ni títbajna. ¹⁶Nk'ie nga tít'énijmía én nda tsuhu Jesucristo, najmi kui kjuaha tsa nk'a k'uasjéhena yjona. At'ahá ja tjínena nga b'a ts'ian. jNimá rú ts'ihinna tsa najmi k'uenijmía én nda tsuhu Jesucristo!

¹⁷Kui b'a maha, tsa xá an mjehena k'uenijmíhina én nda tsuu, ts'ínkjáíhín chjína. Tunga tsa tjínena nga k'uenijmía, a xá xi

kik'ajǎhina tǎts'ian ma. ¹⁸Kui nga, ¿mǎ chǎjǎhi xi ts'inkǎjǎhín ra ma? Chǎjǎnɡa nga najmi f'achǎjǎ nga b'enijmǎiá én nda tsuhu Jesucristo ko nga najmi bankia ni xi kanéna ngat'aha nga tǎb'enijmǎiá én nda tsuu.

B'ǎ ts'ín kitsúya Pablo ni xi ts'ín nga ts'ín xáha

¹⁹Ndaha tsa ndaína yjona, tunga jahá kits'in ma yjona nku nda musuhu ngayjee xuta, tu xi b'a ts'ín nkjin xuta ts'in ngana sahana nga kuakj'á éhen Cristo. ²⁰Ajihin xuta xi ntje judio tjeheh ra b'a ts'ian xi nkú ts'ín xuta xi ntje judio tjeheh ra, tu xi ts'in nganahana kui xuto. Ndaha tsa an najmi tǎjǎnana kjuatéxuma xi kin'ekjas'ehen Moise, tunga ajihin xuta xi tǎjǎnehe kjuatéxumoo b'a ts'ian xi nkú ts'ín xi tǎjǎnehe kjuatéxumoo, tu xi ts'in nganahana kui xuto.

²¹Ajihin xuta xi najmi tǎjǎnehe kjuatéxuma xi kin'ekjas'ehen Moise b'a ts'ian xi nkúhu tsa ko an najmi tǎjǎnana kjuatéxumoo, tu xi ts'in nganahana xuta xi najmi tǎjǎnehe kjuatéxumoo. Tunga najmi tǎjǎn t'axǎhín ra kjuatéxumaha Ntǎnǎ, at'aha kjuatéxumaha Cristo tǎjǎnajihin. ²²Ajihin xuta xi najmi ndǎ tǎincha nginkun Ntǎnǎ b'a ta ts'ín ts'in ma yjona, tu xi ts'in nganahana xuta xi najmi kje ndǎ tǎincha. Ts'in ma yjona xi nkú k'un ngayje tǎkjǎ xuta tu xi tǎin xi k'uankihi. ²³B'a tǎts'ian at'aha xáha én nda tsuhu Jesucristo tǎts'ian ko tu xi ta sakúhuna kjuanda xi tsǎ.

²⁴¿A najmi yanú, nk'ie nga nkjin maha xi bangatsanka, nkuhú xi ts'ín ngana? Kui nga tǎyútsanka sisihinu tu xi kama n'ekǎjǎhín ruu chǎjǎ xi k'uaínǎ. ²⁵Ko xi b'énda yjoho nga tsúton, nkjin ni xi b'éch'oho yjoho. B'a incha ts'ín tu xi kama ts'ínkǎjǎhín ra nku chǎjǎ xi batsun. Tunga ná bi, tǎb'endaá yjoná tu xi n'ekǎjǎhín raá nku chǎjǎ xi najmi mahá batsun.

²⁶An bi, najmi tǎbangatsanka xi nkúhu xi chuba tǎbangatsankahá ko najmi tǎkjan xi nkúhu xi chuba tǎb'éjin séhén. ²⁷Tu sa ní tǎtsjaha kjuanimǎ yjonintena ko tǎts'ink'a nǎyá, tu xi najmi ndyjahana an xi y'enijmǎihǎ xuta xingisoo.

B'ǎ ts'ín tsakúya Pablo nk'ie nga kits'ínchǎjén ni xi kamat'ain ntje cháha xuta judio

10 Jun já nts'e, najmi mjena nga n'echayo ni xi kamat'ain ntje cháha xuta judio. Ngayjee y'ema kintehe nǎntǎ xi kitsǎnǎyáha ko ngayjee j'atikǎ ntáchak'uun. ²B'a ts'ín ngayjee nkuhú kamakoho Moise nga kisaténtǎjin nǎntǎ ko ntáchak'uun.

³Nkuhú nichine xi kitsǎhǎ Ntǎnǎ incha kikjine ngayjee ⁴ko nkuhú ntǎ xi kitsǎhǎ Ntǎnǎ incha kik'i ngayjee. Incha kik'i ntánijua xi tsitjuhu nku nǎxi xi kitsǎhǎ Ntǎnǎ. Kui nǎxi xi Cristo ko kui nǎxi xi kitsjenkoho. ⁵Tunga ndaha tsa b'a kama, najmi kisasǎhín Ntǎnǎ xi nkú ts'ín y'entu nkjin xuto. Kui kjuaha incha k'ieheh ante kixiu.

⁶Ni xi kamat'ain xuta xu'bo kis'ejna chubayaná, tu xi najmi n'e mjehená ni xi najmi nda xi nkú ts'ín kits'ín mje xuta xu'bo. ⁷Najmi tu n'etsjohoo ntia xi ntsja xuta ts'innda xi nkú kits'ín k'ua xuta xu'bo, xi nkú ts'ín tjít'a éhen Ntíaná: “Y'entu xuta nga kikjine ko kik'i ko askahan incha tsisintjen nga kitenki tsjo.”

⁸Najmi tu chuba suntukonáá xinkjá xi nkú kits'ín k'ua xuta xu'bo. Kui kjuaha k'iehen kan jan mii nga nkuhú nistjin sa. ⁹Najmi tu chjut'ayák'aán Nda Ntíaná xi nkú kits'ín k'ua xuta xu'bo. Kui kjuaha k'iehen nga kikjinehe ra ye. ¹⁰Najmi tu chubayanó Ntíaná xi nkú kits'ín k'ua xuta xu'bo. Kui kjuaha nga ntítsje xi ts'ínkje xuta kits'ínk'iehen ra.

¹¹Ni xu'bi xi kamat'ain ntje cháha xuta judio, kui xi kis'ejna chubayaná. Xujun éhen Ntíaná kis'et'a niu tu xi tsjániyáhaná ná xi tintsubaá nd'ai nistjin xi fekuu. ¹²Kui b'a maha, xi ts'ínkjkink'un nga najmi kuijnenki, kakuhun yjohoo tu xi najmi kuijnenkihi. ¹³Ni xi tímat'on nga tíchjut'ayák'unnuu najmi ts'ati sa nga ni xi mat'ain xuta. Ma ma 'yún tak'aán Ntíaná. Najmi tsjante tsa 'yún chjút'ayák'un sanuu nga kj'uaínenuu nku ni xi najmi kuichjúkjuanu. Tsjániyá nínuu xi nkú ts'ín kuítjunkihinu nk'ie nga chjút'ayák'unnuu, tu xi b'a ts'ín n'e chúkjuahanu ni xi nibanenuu.

¹⁴Já nts'ena xi tjong, kui nga tankín t'axihin ruu ntia xi ntsja xuta ts'inndaha. ¹⁵Tínchjakonuu xi nkúhu xuta xi be ni xi ts'ín. N'enkjink'un sisiun ni xi tíxinnuu. ¹⁶Nk'ie nga 'yaá binu nkjúun nga 'bajihí máb'achjhi Ntíaná, ¿a najmi nkuhú bichú majihín jníhi Cristo? Ko nk'ie nga chineé ninkuan xi bakjanyáá, ¿a najmi nkuhú bichú majihín yjonintehe Cristo? ¹⁷Nkuhú maha ninkuon, kui nga nkuhú yjoninte bichú mahaná ndaha tsa nkjin mahaná. At'aha ngatentéé sakút'aná ninkuan xi nkuhú maha.

¹⁸Chase chubayohoo xuta xi ntje Israel tjeheh ra. Xi incha kjine yjohoo chu xi chje 'bajihí Ntíaná, ¿a najmi nkuhú bichú majihín chje xi s'entusún nqchan chje? ¹⁹Nk'ie nga b'a tíxian, najmi b'a tíxian tsa chjhi ra ntia xi ntsja xuta ts'inndaha ko ta ndaha tsa chjhi ra yjo xi 'bajihí chje. ²⁰Ni xi tíxin níná, chje xi tsjáha ntia xuta, kui xi jánindoo títsjáha. Najmi Ntíaná tsjáha niu. Najmi mjena tsa tjín ni xi s'ekonuu jánindoo.

²¹Najmi kama s'iuuyo chutsín xi ts'e Nda Ntíaná ko ta chutsín xi ts'e jánindoo. Najmi kama kuintsubat'o yámixa xi ts'e Nda Ntíaná ko ta yámixa xi ts'e jánindoo. ²²¿A ra mjehéná nga kama stihí Ntíaná? ¿A 'yúhún tjinná nga'yún nga kama kuankín kontraá Ntíaná?

B'i ts'ín tsakúya Pablo nkjé chineé yjo xi ja kin'e ma chje

²³“Ma ts'ian tu mí nihí ni”, tsu xuta. Tunga najmi ngandanáhá ngayjee niu. “Ma ts'ian tu mí nihí ni”, tsu xuta. Tunga najmi

ngatenteehé niu tsjá nga'yúnná. ²⁴Ndaha nku najmi tu katangisjai ngandaha. Ni xi kama ní ngandaha xuta xinkjín katangisjai.

²⁵Kama chinoo tu mí yjohó ni xi tjín má saténa yjo. Najmi tu b'a bixíun tsa kui niu xi ts'íinkatsún kjuankjintak'unnuu. ²⁶At'aha ngayjee asuntee ko ni xi tjíhín, Ntíaná ts'e.

²⁷Tsa nku xi najmi s'ejihín Ntíaná b'a kuítsunuu nga kuankín chinoo niñu ni'yaha ko tsa mjenuu kuankíun yo, chinoo tu mí ni xi k'u'éjñat'ahanuu. Najmi tu b'a bixíun tsa kui niu xi ts'íinkatsún kjuankjintak'unnuu. ²⁸Tunga tsa tjín xi b'a kuítsunuu: "Ntia xi ntsja xuta ts'íindaha ja kik'aíhi chje yjo xu'bi", najmi tu chino nk'ie. T'ech'óhoo yjonuu niu tu ngat'aha tsa nkú kamaha xi b'a kuatsúnuu ko tu ngat'aha tsa kuatsún kjuankjintak'uhun.

²⁹Najmi b'a tíxian tsa kjuankjintak'uhun xi kjíne niu kuatsún. Kjuankjintak'un níhi xi b'a kuatsúu tíxian. At'aha, ¿á xi nkú ts'ín tínchjaha kjuankjintak'uhun xuta xi kj'ái chasehe ra nga cha mí nihi xi ma ts'ian? ³⁰Tsa tsjaha máb'achjîhi Ntíaná at'aha títsjana ni xi tíine, ¿á kuínchjayanehena xuta tsa kjíne ni xi ja kuatsjaha máb'achjîhi Ntíaná?

³¹Kui b'a maha, tsa chinoo ko tsa s'iu ko tsa tu mí nihí ni xi n'oo, ngayje ni xi n'oo katakúchji kjuachánkaha Ntíaná. ³²Najmi tu n'o nga ndyjajihín xuta xi ntjehe judio tjehe ra ko xi najmi ntjehe judio tjehe ra ko ta ndaha xuta ninkuhu Ntíaná. ³³An bi, tu mí nihí ni xi ts'ian, ni xi sasíhín ngayjee xuta ts'ian. Najmi tu ni xi ngandana bangisja nga ts'ian. Ni xi kama ní ngandaha xuta ts'ian. B'a ts'ian tu xi k'uankihi.

11 B'a ta n'oo xi nkú nga ts'ian, at'aha an bi, b'a ta ts'ian xi nkúhu Cristo.

B'í ts'ín tsakúya Pablo xi nkú ts'ín skuenkjún jminchjún

²Tsjo ts'ín nchjanjmíyahánuu, já nts'e, at'aha tehente f'áítsjennuu an ko at'aha t'n'o ni xi tsakuyánuu. Kui ni xi kik'aína ko b'a ta ts'ín kits'inkjas'ennuu. ³Tunga mjehéna nga choo nga Cristo kui xi tjen tíjuhun nga nkúnkú jáx'in, ko xi tí'mi x'in kui xi tjen tíjuhun chjuúhun, ko Ntíaná kui xi tjen tíjuhun Cristo.

⁴Tu yá ndahá ni xi k'u'é'ma nintaku nk'ie nga kuínchjako Ntíaná ko tsa nga ts'íinkjas'en én xi tsjáha Ntíaná, kui xi najmi tíbenkjún xi tjen tíjuhun. ⁵Ko tu yá tachjuúhún ni xi najmi k'u'é'ma nintaku nk'ie nga kuínchjako Ntíaná ko tsa nga ts'íinkjas'en én xi tsjáha Ntíaná, kui tachjúun xi najmi tíbenkjún xi tjen tíjuhun. Nk'ie nga chasehe ráá, b'a joyaha tsa kich'ajnu kaha. ⁶At'aha tsa nku tachjuún najmi k'u'é'ma nintaku, tu sahá katate ntsjaha. Ko tsa subaha nga kuate ntsjaha ko a ra nga kj'uájnu kaha yjoho, tu sahá kat'é'ma nintaku ma.

⁷Xi tí'mi ndax'in najmi tjǐhin nga k'u'é'ma nintaku. At'aha xi nkú ts'ín tjǐyaha Ntǐaná, b'a ts'ín kits'ínndaha Ntǐaná ndax'in xi tjuun, kó kui ndo bakúchji kjuachánkaha Ntǐaná. Tunga xi tí'mi tachjuún, kui xi bakúchji kjuachánkaha xi tí'mi x'in. ⁸At'aha ndax'in xi tjuun najmi yjonintehe tachjuún nibaha ra. Tachjuún xi tjuun ní xi nibaha ra yjonintehe ndax'iun. ⁹Najmi ngandaha tachjuún kin'endaha ndax'iun. Ngandaha ní ndax'iun kin'endaha tachjuún. ¹⁰Kui kjuaha tjǐhin nga k'u'é'maha nintaku xi tí'mi tachjuún, tu xi skuenkjúhun xi batéxumaha kó skuenkjúhun ntítsjee.

¹¹Tunga ajinná xi s'ejinná Nda Ntǐaná, tjín xi chjuún at'aha ta tjín xi x'in, kó tjín xi x'in at'aha ta tjín xi chjuún. ¹²At'aha xi nkú ts'ín yjonintehe ndax'iun nibaha ra tachjuún xi tjuun, b'a ta ts'ín nd'ai xi tí'mi tachjuún tsihin xi x'in tí'mi. At'aha ngatentee ni xi tjín nginkun Ntǐaná nibaha ra.

¹³N'enkjǐntak'un sisiun ni xu'bi. ¿A nda tjín nga nku tachjuún najmi k'u'é'ma nintaku nk'ie nga kuinchjako Ntǐaná? ¹⁴Xi nkú ts'ín yaha, tsa nku nda ts'ínndju ntsjaha, ta kui ta maha títsjáha kjuasuba yoho. ¹⁵Tunga tsjohó tjǐhin nku tachjuún tsa ts'ínndju ntsjaha. At'aha kui xi kik'aihi nga ndju kama ntsjaha tu xi k'u'é'makoho nintaku.

¹⁶Tunga tsa tjín xi mjehe k'uésiyáha ni xu'bi, najmi b'a ts'ín nkani kó ta ndaha najmi b'a ts'ín nkaha xuta ninkuhu Ntǐaná.

**B'ǐ ts'ín tsakúya Pablo xi nkú ts'ín tjǐhin
nga n'ekj'áítsjen ngabayaha Nda Ntǐaná
nk'ie nga kama ñjakú xuta ninku**

¹⁷Najmi tǐnchjako tsjo tsjonuu ni xi xǐnnuu nd'ai, at'aha najmi ngandanuu ma ñjakúkohonu xinkiu. N'e'un níhi xinkiu nga ma ñjakú. ¹⁸Kui ni xu'bi xi tjun xǐnnuu. Tí'miyana nga b'ǐ ngjáhán ch'ach'anú xinkiu nga n'esje t'axiún yjonuu nk'ie nga ma ñjakú ninku. Kó santaha tís'ejinna ni xi tí'mina, ¹⁹at'aha tjǐhín ni nga ch'ach'anú xinkiu nga n'esje t'axiún yjonuu tu xi chaha yá xi ndjá síjña nginkun Ntǐaná.

²⁰Nk'ie nga ma ñjakúkoo xinkiu, najmi n'o xi nkú ts'ín tsakúyaná Nda Ntǐaná nga kikjineko sa já ni'yakuyáha. ²¹At'aha nk'ie nga chino, b'ǐ ngján nkúnkú fakj'á ni xi ts'e. Tjín xi najmi sakúhu nichinee kó tjín ngá xi ma ch'i. ²²¿A ra najmi tjǐhínnuu ni'ya má nga kama chinoo kó s'iu? ¿Á tu ni xi najmi chumi ni chǐhi ra tǐn'ekohonu xuta ninkuhu Ntǐaná kó tǐbaihi ruu kjuasuba xuta xi najmi chumi ni xi tjǐhin ra? ¿Nkú xǐnnuu? ¿“Nda tǐn'o”, a xǐnnuu? Nk'ie nga b'ǐ tǐn'o, najmi tjín xi nkú ts'ín “Nda tǐn'o” xǐhǐnnuu.

²³Ta kui ma maha én xi kitsjána Nda Ntǐaná, ta kui ma maha én xi tsakuyánuu. B'ǐ kixinnuu: Ta kuihi nǐstjen nga kin'ekjas'en Nda Ntǐaná

Jesu, jakj'á ninkuǎn. ²⁴Nk'ie nga ja kamaha nga kitsjáha máb'achjǐhi Ntǐaná, tsakjánya ninkuǎn ko b'ǐ kitsú: “Kui xu'bi xi yjonintena xi n'ekjas'en ngandanuu. B'ǐ ta n'oo tu xi kj'uaǐtsjehennuu an.”

²⁵B'a ta ts'ín jakj'á chutsǐun nk'ie nga ja kamaha nga kikjine nichinee. B'ǐ kitsú: “Kui chutsǐin tǐbakúchji jnǐna xi ja tǐb'éndako tsetsehe Ntǐaná nd'ǎi xi nkú ts'ín nda ts'ínko xuta. B'ǐ ta n'oo tu xi kj'uaǐtsjehennuu an xki xki nga s'iu.” ²⁶Kui b'a maha, xki nga chinoo ninkuǎn ko s'iyoo chutsǐun, b'aha ra nga kik'atuts'ihǐn kui niǐ santa nkúhu nga kj'uaǐ ngáha Nda Ntǐaná, tǐbixinyo nga k'ien.

²⁷Kui nga tu yáhá ni xi najmi skuǎnkjúhun nga kjine ninkuǎn ko nga k'úíya chutsǐun nga ts'ín xi nkú kitsú Nda Ntǐaná, kui xi tǐtsjehen jé nga najmi tǐbenkjún yjonintehe ko jnǐhi Nda Ntǐaná. ²⁸Kui b'a maha, kintehe ni nga xuta kjine ninkuǎn ko nga k'úíya chutsǐun, tjǐhin ni nga katasejin sisin animaha. ²⁹At'aha tsa tjǐn xi chuba kjinehé ko chuba k'úíhǐ nga najmi ts'ínkie yjoho nga yjonintehe Nda Ntǐaná niu, kui xi n'enijéhe ra at'aha chuba tǐkjinehé ko tǐ'bi niu.

³⁰Kui kjuaha nga tjǐhin ajinnuu nkjin xi kjintu'un ko xk'ién ko k'ua xi ja k'ien. ³¹Tunga tsa chasejin sisihǐn animaná, Ntǐaná najmi ts'ínk'anjiná jé. ³²Nk'ie nga base Ndantǐaná tsa nda ko tsa najmi nda ni xi n'eé, yo tǐtsjániyáná tu xi najmi n'enijéhená nǐstjin nga n'enijéhe xuta xi tjǐn asuntee.

³³Kui b'a maha, já nts'ena, nk'ie nga kama ñjakú nga chinoo nichinee, b'ǐ ngján chúyohoo xinkiu. ³⁴Tsa tjǐn xi tíma bjoho, ni'yaha kakjine. B'a kats'ín tu xi najmi ts'ínk'a niyáha ra Ntǐaná ngat'aha ni xi tǐts'ín nk'ie nga tíma ñjakúkoo xinkiu.

Ni xi tjǐn sa ajinnuu, nk'ie nga kfínsenuu k'uendá.

B'ǐ ts'ín tsakúya Pablo nk'ie nga kj'ǎi kj'ǎi kjuanda tsjáha Espirituhu Ntǐaná xuta ninku

12 Jun já nts'e, mjena nga choo nga nkjin tǐkjá kjuanda xi tsjáha Espirituhu Ntǐaná xuta ninku.

²Yo xi nkú n'e tintsuboo nk'ie, nga najmi kjee s'ejinnuu Ntǐaná. Xi nkúhu tsa kichju'yunnuu nga kitsjennkǐhuu ntǐa xi najmi maha nchja, xi ntsja xuta ts'ínndaha. ³Kui b'a maha, tǐxinyahanuu nga ndaha nku xuta xi Espirituhu Ntǐaná tǐts'ínkinchjaha najmi ma b'a tsu: “ǐNajmi nda Jesu!” Ko ta ndaha nku najmi ma: “ǐJesu xi Nda Ntǐaná!” tsu, tsa najmi tǐñajihǐn Espirituhu Ntǐaná.

⁴Kj'ǎi kj'ǎi kjuanda xi 'bǎihǐ xuta, tunga nkuhú maha Espirituhu Ntǐaná xi tsjáha. ⁵Kj'ǎi kj'ǎi xá xi maha ts'ín xuta, tunga nkuhú maha Nda Ntǐaná xi tsjá xáha. ⁶Kj'ǎi kj'ǎi ni xi maha incha ts'ín, tunga nkuhú Ntǐaná xi ts'ín ngayjee niu nga ts'ínxájinyjehe xuta ninku.

⁷Nga nkúnkú kik'ǎihǐ nga Espirituhu Ntǐaná kuakúchji yjoho ngandaha ngayjee xuta ninku. ⁸Tjǐn xi Espiritu tsjáha nga kuitsuyaha

xuta én xi nanka, ko ta tjín xi ta kuihi Espiritu tsjáha nga kuitsuyaha xuta ni xi kamankjihin. ⁹Tjín xi ta kuihi Espiritu tsjáha nga 'yún s'ejihin Ntíaná, ko tjín ngá xi ts'ínkikihi xuta. Ta kuihi Espiritu xi tsjáha nga b'a ts'ín.

¹⁰Tjín xi maha ts'ín kjuankjún, ko tjín ngá xi Ntíaná tsjáha éhen, as'ai ts'ínkjas'en niu. Tjín xi mankjihin tsa kjuaxi nga Espirituhu Ntíaná tjínajihin xuta. Tjín xi nchja kj'ai én xi tsjáha Espiritu, ko tjín ngá xi ts'ínk'atiya én xi tsjá Espiritu. ¹¹Nkuhú Espirituhu Ntíaná xi ts'ín ngayjee ni xu'bi. Xi nkú ts'ín mjehe tsjá ni, b'a ts'ín tsjáha nga nkúnkú xuta ninku.

B'i ts'ín tsakúya Pablo nk'ie nga nkuhú kich'aá xinkjá ñá xi xuta ninku

¹²Xi nkúhu yjonintená, nkuhú maha tunga nkjihín ni xi tjíhin nga tjíxanya. Ko ngayjee ni xi tjíhin, ndaha tsa nkjin maha tunga nkuhú yjoninte bichú ma. B'a ta tjín ngat'a ts'e Cristo. ¹³At'aha nkuhú Espirituhu Ntíaná ksaténtáhaná ngatenteé ko ngayjeé kik'ainá nga ki'yaá ta kuihi Espirituhu Ntíaná. B'a ts'ín nkuhú yjoninte tsichu mahaná, ndaha tsa xuta xi ntje judio tjeheh ra ko ta ndaha tsa xi najmi ntje judio tjeheh ra, ndaha tsa xuta musu xi kich'atse ko ta ndaha tsa xi ndái yjoho.

¹⁴Nku yjoninte najmi nku ndjuú maha. Nkjin ní ni xi y'aha ra nku yjoninte. ¹⁵Tsa b'a kuitsu nku tsukaá: “Najmi yjonintee y'ahana at'aha najmi ntsa 'mina”, tsa b'a kuitsu, ¿a kui kjuaha nga najmi ta yjonintee y'aha ra? ¹⁶Ko tsa nku tjabaxínñjaá b'a kuitsu: “Najmi yjonintee y'ahana at'aha najmi tunkun 'mina”, tsa b'a kuitsu, ¿a kui kjuaha nga najmi yjonintee y'aha ra?

¹⁷Tsa tu subahá tunkun kama yjonintee, ¿nkú ts'ín kúinú'yáhaná? Ko tsa tu subahá tjabaxínñju kama yjonintená, ¿nkú ts'ín kj'uántahaná? ¹⁸Xi nkú ts'ín kisasíhin Ntíaná, b'a ts'ín y'éntu nga nkúnkú ni xi tjíhin yjonintená. ¹⁹At'aha tsa nkuhú ni xi tjíña, najmi ta yjonintehe ma. ²⁰Kui nga ndaha tsa nkjin maha ni xi y'aha ra yjonintee, tunga nkuhú maha yjonintee.

²¹“Najmi machjénna ji”, najmi tsuhu tunkaán ntsáá. Ta ndaha: “Najmi machjénna jun”, najmi tsuhu nintakaá tsukaá. ²²Tu sa ní má najmi 'yún machjénna yjonintená bixíhaán, tu sa ní kui xi 'yún machjén sa. ²³Ko xi b'a maná nga kinte tjen, kui xi tu sahá tsjo n'ek'íé saá. Ko má najmi mjená nga kama chji, kui xi b'e'maá, ²⁴at'aha najmi machjéhen nga k'úé'maá yjonintená má nga ma chji bixíáán. B'a kits'ínk'íé Ntíaná yjonintená nga 'yún n'echjí saá xi b'a maná nga kinte tjen.

²⁵B'a kits'ín Ntíaná tu xi najmi kama ngabihí ra xinkjín yjonintená ko tu xi b'i ngján kúhun ra xinkjín. ²⁶Nga ngayjee ni xi y'aha ra

yjonintená, tsa tjín xi un tíbehe, ta un skuêhe xi k'oó. Kò tsa 'yún tíchun sahá nku, ngayjee xi k'oó ta tsjo incha kamaha.

²⁷Jun xi yjonintehe Cristo. Nga nkúnkú jun, jun xi yjonintee.

²⁸Ntíaná kitsjá nga s'e ajihîn xuta nînkû tjun já postru, xi ma johó já profeta xi tsuya én xi Ntíaná tsjáha, xi ma jahan já maestru, kò askahan xi maha ts'ín kjuankjún, kò xi maha ts'ínnkihî xuta, kò xi be nkú ts'ín kuasinko xuta, kò xi tsjen tíjún, kò xi nchja kj'ai én xi Espirituhu Ntíaná tsjáha.

²⁹¿A ngatenteehé xuta nînkû xi já postru? ¿A ngatenteehé xi já profeta? ¿A ngatenteehé xi já maestru? ¿A ngatenteehé xi maha ts'ín kjuankjún? ³⁰¿A ngatenteehé xi kik'aihi nga kamaha ts'ínnkihî xuta? ¿A ngatenteehé xi kik'aihi nga nchja kj'ai én xi tsjáha Espirituhu Ntíaná? ¿A ngatenteehé xi maha ts'ínk'atiya nkú tsuhu ra kj'ai én xi Ntíaná tsjáha xuta?

³¹Kui b'a maha, ajihîn ngayjee kjuanda xi tsjá Espirituhu Ntíaná, n'e mjo xi kjennuu niyá. Tunga xínyahánuu nku xi 'yún kjennuu niyá.

B'i ts'ín tsakúya Pablo nk'ie nga kjuatjoo xi 'yún chjî saha

13 Tsa mayjena én xi tjín kò én xi nchja ntítsjee tunga tsa najmi tjíhîna kjuatjo, xi nkú joyaha nku ni xi tu tífanéhé bichú ma kò a ra nku kichá xi tífanet'áha son xi ch'on ts'ín nu'yá nga tín'ekjane. ²Tsa ts'inkjas'en én xi tsjána Ntíaná, tsa mankjinna ngayjee ni xi y'éjña 'ma Ntíaná, tsa be tu mí nihí ni, kò tsa 'yún s'ejinna Ntíaná nga santaha kama ts'inkjî t'axián naxi, tunga tsa najmi tjíhîna kjuatjo, najmi chumi ni chjîhi ra an. ³Tsa tsjaha xuta x'an ngayjee ni xi tjínna kò tsa ts'inkjas'en yjona tu xi kuitîhi ngandaha xuta xi kj'ai, tunga tsa najmi tjíhîna kjuatjo, tu kjuandahá b'a ts'ian.

⁴Xi tjíhîn kjuatjo, kui xi ta tjíhîn kjuatsenta kò nda animaha. Xi tjíhîn kjuatjo najmi xintak'un, najmi nchja én ngak'un, najmi nk'a b'asje yjohó, ⁵najmi ts'ín ni xi najmi sasíhîn xuta xingisoo, najmi tu ni xi ts'e subahá bangisjai, najmi kitsa ma kjahan, najmi b'éjin tak'un ni xi najmi nda kin'ehe, ⁶najmi tsjo maha ni ch'onk'un xi ts'ín xuta. Tsjo ní maha ni xi naxu ts'ín xuta. ⁷Xi tjíhîn kjuatjo ts'ín'yún tak'unyje ni xi f'ajin, s'ejihîn ngayjee ni xi ts'e Ntíaná, ma 'yún k'un tehente Ntíaná, kò ts'ín chúkjuayje ni xi mat'ain.

⁸Najmi kamaha kfeya kjuatjoo. Kuichú nistjin nga najmi ta ts'íinkjas'ehe já profeta éhen Ntíaná, kò nga najmi ta tsjáha Ntíaná nga kuinchja xuta kj'ai kj'ai én, kò nga najmi ta kamachjéhen nga cha xi nkú ts'ín yaá nd'ai. ⁹At'aha tu ichíhí yaá nd'ai kò tu ichíhí ni xi tsuaná já profeta nd'ai, ¹⁰tunga nk'ie nga kuitjusun ni xi tjíhîn nga kama, nk'iehé kfet'a ni xi tu ichíhí yaá nd'ai.

¹¹Nk'ie nga ndyjana, kinchja xi nkú ts'ín nchja jántí xi, kits'innkjǎhín k'an xi nkú ts'ín ts'innkjǎnk'un jántí xi, ko kamankjinna xi nkú ts'ín mankjǎhín jántí xi. Tunga nk'ie nga ja kama chá, y'ejǎ t'axián ni xi ts'ín jántí xi. ¹²At'aha nd'ai tu tíya xanáá ni xi ts'e Ntǎná xi nkú joyaha tsa nku chutsín tíchaseyaá nga najmi nda ts'ín tíyaá, tunga kuichúhú nǎstjin nga cha sisián Ntǎná. Nd'ai chuba be, tunga kuichúhú nǎstjin nga skue sisian. B'a ts'ín skue xi nkú ts'ín bena.

¹³Najmi maha feya nga tís'ejinná Ntǎná ko nga tíma 'yún k'aán ko nga tjinná kjuatjo. Tunga kjuatjoohó xi 'yún chǎhi ra nga nga jaan ni.

B'i ts'ín tsakúya Pablo xá xi tjǎhín nga kj'ai kj'ai én nchja xuta

14 N'e mjo kjuatjo ko ta n'e mjo nkjin tíkjá kjuanda xi tsjá Espirituhu Ntǎná. Tunga ajǎhín kui niu, 'yún n'e mjo nga Ntǎná tsjánuu éhen ko nga n'ekjas'on. ²At'aha xi tsjáha Espirituhu Ntǎná nga kj'ai én kuinchja, kui xi Ntǎná nchjako, najmi xuta. Nkuhú Espiritu be ni xi nchja. Najmi tjǎna chji niu. Najmi ch'a be nkú tsuhu ra. ³Tunga xi Ntǎná tsjáha éhen ko nga ts'ínkjǎs'en, kui xi xuta nchjako tu xi kjésintjehen, kuasinko ko tsjá nga'yúhun.

⁴Xi kik'aihi nga nchja kj'ai én xi najmi ch'a mankjǎhín, ta kuihi tsjá nga'yún subaha yjoho. Tunga xi kik'aihi nga Ntǎná tsjáha éhen ko nga ts'ínkjǎs'en, kui xi kjesintjen xuta ninku. ⁵Mjena kai tsa ngatento k'uainuu nga chubo én xi kj'ai xi tsjá Espiritu, tunga 'yúhún mje sana tsa k'uainuu nga tsjánuu Ntǎná éhen ko nga n'ekjas'on. At'aha 'yún chǎ saha ra xi ts'ínkjǎs'en én xi Ntǎná tsjáha nga xi nchja én xi kj'ai xi najmi ch'a mankjǎhín. Tunga ndahá tjín tsa tjín xi ts'ínk'atiya én xi kj'ai xi tsjáha Espiritu, tu xi b'a ts'ín kuísintjehen xuta ninku.

⁶Kui b'a maha, já nts'e, tsa kfínsenuu ko kuinchjakonuu kj'ai én xi tsjána Espiritu xi najmi ch'a mankjǎhín, ¿mí nihi xi sakúnuu tsa b'a ts'ian? ¿A najmi tu sahá nda tjín nga xínyanuu ni xi b'éjǎna chjina Ntǎná, ko a ra ni xi ts'e Ntǎná xi mankjǎnna, ko a ra ts'ínkjǎs'ennuu nku én xi kitsjána Ntǎná, ko a ra tjín ni xi kuakuyánuu?

⁷Santaha ni xi fane xi nkúhu yánaxu ko a ra arpa, tsa najmi kj'ai kj'ai ts'ín fane, ¿nkú ts'ín chaha suun xi tín'ekjanekohó yánaxu ko a ra arpa? ⁸Ko tsa najmi kjuane sisin tjio xi nchjaha já juun nga kján, ¿yá xi k'uénda yjoho nga ngjuai kján? ⁹B'a ma ajinnuu. Tsa chubo kj'ai én xi najmi ch'a mankjǎhín, ¿nkú ts'ín kamankjǎhín ra xuta ni xi chubo? B'a joya xi nkúhu tsa tíchubajǎhínsón.

¹⁰Nkjin maha én xi tjín asuntee ko nkúnkú tjǎhín sin. ¹¹Tunga tsa najmi tímankjinna nkú tsuhu ra én xi tǎnchjakona nku nda, nku

nda xi najmi yo nankihı kamaha an ndo ko an nku nda xi xin nankihı kamana ndo. ¹²B'a ta tıma ajinnuu. Mjenuu nga s'enuu nkjin tıkjá kjuanda xi tsjá Espirituhu Ntíaná. 'Yún ní n'e mjo nga nkjin katuma kjuanda xi kjénsıntjen xuta ninku.

¹³Kui b'a maha, xi nchjaha kj'ái én xi tsjáha Espiritu, katankihı Ntíaná tu xi kamaha ra ts'ınk'atiya én xi kuınchja. ¹⁴At'aha tsa nk'ie nga kuınchjaka Ntíaná, kuınchja kj'ái én xi tsjana Espiritu, najmi ts'inchjén kjuankjink'unna. Tu animana tınchjakohó Ntíaná. ¹⁵Kui nga, ¿mı ni xi ts'ian ni ma? Animana kuınchjakohona Ntíaná, tunga ta ts'inchjénná kjuankjintak'unna. Animana sékohona, tunga ta ts'inchjénná kjuankjintak'unna. ¹⁶At'aha tsa tu animahi ní tın'etsjokoho ri Ntíaná ko as'ai tıbasınñjuhi nku xi najmi be ni xi tın'ei, ¿nkú ts'ın nkuhú ts'ın makoho ri yjoho nga ts'ııntsjohe Ntíaná nk'ie nga najmi tımankjihın ni xi tıchubai? ¹⁷At'aha kjuaxı nga nda ts'ın tın'etsjoihi Ntíaná nga b'a tın'ei, tunga najmi tıchjusıntjennı nda xinkuu.

¹⁸Tsjaha máb'achjłhi Ntíaná nga 'yún nchja sa kj'ái én xi tsjana Espiritu nga jun. ¹⁹Tunga nk'ie nga ma ñjakúka xuta ninku, tu sahá mjena kuınchja tsa tu un tsu'ba én xi kuitjujin kjuankjintak'unna nga te miı tsu'ba én xi najmi ch'a kamankjihın. At'aha én xi bitjujin kjuankjintak'unna, kui xi tsjánıyáha xuta xingisoo.

²⁰Jun já nts'e, najmi b'a tu ts'ın n'enkjıntak'un xi nkú ts'ın ts'ınnkjink'un jántı xi. Xi nkú ní ts'ın je tıyáha ntı xi, b'a ní ts'ın je kas'eyanuu, tunga n'enkjıntak'unnú xi nkú ts'ın ts'ınnkjink'un xuta xi chá. ²¹B'ı ts'ın tıjt'a xujun kjuatéxumoo:

Kj'ái én ko kj'ái xuta xi xin nankihı
ts'inchjén nga kuınchjaka xuta xu'bi.
Tunga ndaha tsa b'a ts'ian,
najmi kuasınñjuna, kitsú Ntíaná.

²²Kui b'a maha, kj'ái én xi tsjá Espiritu nga nchja xuta, kui xi bakúchji nga'yúhun Ntíaná ngandaha xuta xi najmi s'ejihın Ntíaná, najmi ngandaha xi ja s'ejihın. Tunga én xi tsjá Ntíaná nga n'ekjas'ehen xuta, kui xi 'bai ngandaha xuta xi ja s'ejihın, najmi ngandaha xi najmi s'ejihın.

²³Tsa tıma ñjakú xuta ninku ko tsa ngayjee kuınchja kj'ái kj'ái én xi tsjáha Espiritu, ko tsa as'ai kjuas'en yo xuta xi najmi be ni xi tın'o ko tsa xuta xi najmi s'ejihın Ntíaná, ¿a najmi b'ahá kuıtsu nga lukuu? ²⁴Tunga tsa ngatentoo tın'ekjas'on én xi tıtsjánuu Ntíaná, tsa as'ai kjuas'en yo xi najmi s'ejihın ko tsa xi najmi be ni xi tın'o, nk'ie nga kuınt'é ni xi tıchubo, b'a kuıtsu animaha nga tıhın ngatitsun ko nga n'enıjéhe ra ni xi tjehe. ²⁵S'ejña chji ni xi tıntu'má animaha ko kuasınkúnch'in nga ts'ııntsjohe Ntíaná ko b'a kuıtsu nga kjuaxı nga Ntíaná tıjñajinnuu.

B'i ts'ín tsakúya Pablo xi nkú n'e aya nǐnku

²⁶Kui nga, ¿nkú kuixíaán ni, já nts'e? Nk'ie nga ma ñjakúkoo xinku, tjín xi se, tjín xi bakúyahá xuta xingisoo, tjín xi tsuya ni xi b'éjña chjihí Ntíaná, tjín xi nchjá kj'ái én xi tsjáha Espiritu, ko tjín xi ts'ínk'atiya éen. Ngatentee ni xi n'oo nga nkúnkú, b'a n'oo tu xi chjúsintjehennu xuta nǐnku. ²⁷Tsa tjín xi kuinchjá kj'ái én xi tsjáha Espiritu, tsa jo ko santaha tsa jan katuma. Nkúnkú b'a incha kats'ín ko nku xi kats'ínk'atiya éen. ²⁸Tsa najmi tjín xi mahá ts'ínk'atiya éen, xi nchjá kj'ái én xi tsjáha Espiritu tu sahá jyu kat'ejña. Kanchjako suba yjoho ko kanchjako Ntíaná.

²⁹Ko máha xi ts'ínkjas'en én xi tsjáha Ntíaná, tsa jo ko tsa jan katuma ko xuta xingisoo kats'ínkjkink'un sisin nkú tsuhu ra ni xi tít'é. ³⁰Ko tsa nku xi kab'ejña yo Ntíaná k'uéjña chjihí kj'ái ni, kandjén jyu xi tínchjo. ³¹B'a ts'ín nkúnkú jun kama n'ekjas'on én xi Ntíaná tsjánuu tu xi ngatentoo chahanu ko sakú nga'yúnnuu. ³²Xi kik'áihí kjuanda nga ts'ínkjas'en én xi tsjáha Ntíaná, kui xi tjíhin nga skue chuba nga kuinchjá. ³³At'aha kjuajyu tsjoho Ntíaná, najmi ni xi n'ejnu n'et'a.

Xi nkú ts'ín tjíhaha ngayjee xuta nǐnku xi ts'e Ntíaná, ³⁴jminchjún tjíhin nga ngjuén jyu aya nǐnku. At'aha najmi tjíhin kjuá tsa kuinchjá. Kant'é'éhen x'ihín xi nkú nga títsu kjuatéxumoo. ³⁵Tsa tjín ni xi mjehe skue, ni'yaha kandjásjaiyaha x'ihín. At'aha najmi nda tjín tsa ajihín xuta nǐnku kuinchjá nku tachjuún.

³⁶¿A ajinnuhú kich'atuts'ihín ra nga kis'enjímí éhen Ntíaná? ¿A tu nkuhú jun xi kin'ekjóhoo éen? ³⁷Tsa tjín xi b'a mahá nga Ntíaná tsjáha éhen ko a ra tsa kui xi kits'ínkjáihín nku kjuanda xi tsjá Espiritu, kui xi kats'ínkie nga kjuatéxumaha Nda Ntíaná xi tít'et'ánuu ei. ³⁸Tsa tjín xi najmi ts'ínsihín ni xi tít'et'ánuu ei, najmi tu n'esihun ko kui.

³⁹Kui b'a mahá, já nts'eng, katuma mjenuu nga Ntíaná katsjánuu éhen nga n'ekjas'on ko najmi tu b'ech'óhoo xi kuinchjá kj'ái én xi tsjá Espiritu. ⁴⁰Ngatentee ni xi n'oo, n'esisiun ko tankínko ch'ich'iun.

B'i ts'ín kits'ínkj'áítsjehen Pablo xuta nǐnku Corinto ni xi tjun tsakúyahá

15 Ko nd'ai já nts'e, mjena ts'ínkj'áítsjennuu én nda tsuhu Nda Ntíaná xi y'enjímínuu, xi kin'ekjóhoo ko xi ndjá tinchajun. ²Kui én nda tsu xu'bi ts'íin nga k'uankinuu yjonuu. B'a kama tsa n'etjusun én xi y'enjímínuu. At'aha tsa najmi, tsuhu ra ma nga tu kjuandahá kis'ejinnuu éen.

³Títjun kits'ínkjas'enuu én xi kits'ínkjáihín, nga ngat'aha ngatitsunná k'iehen Cristo. B'a kama xi nkú ts'ín tjít'a xujun éhen

Nt̄ianá. ⁴Kis'eyanji ko n̄istjin xi ma jahan j'áiya ngáha ra ngabayoo, xi nkú ts'ín t̄jít'a xujun éhen Nt̄ianá.

⁵Tsakúchjih̄i yjoho Pedro ko askahan já postru xi te joo. ⁶Askahan nkuhú nga tsakúchjih̄i ra yjoho ts'ati un unchan já nts'eé. Nkjin maha xi t̄jintu sa xi incha kikie Nda Nt̄ianá ko k'ua xi ja k'ien. ⁷As'ai ta tsakúchjih̄i yjoho Santiago ko askahan ngayjee já postru.

⁸Ko xi fekuhu, askahan kjin tsakúchjina yjoho. ⁹At'aha b'a xian nga an xi 'yún ichi sa ajih̄in já postru ko najmi ma k'an tsa nda postru xih̄in yjona, at'aha kitsjennkí unkie xuta n̄inkuhu Nt̄ianá.

¹⁰Tunga tu ngat'aha ní kjuandaha Nt̄ianá tsichu mahana yáha an nd'ai, ko najmi tu kjuandahá kitsjana kjuandaha Nt̄ianá. An xi 'yún kits'inxá sa nga ngayjee já postru xingisoo. Tunga najmi ahán xi b'a kits'ian. Kjuanda xi kik'ai nina, kui xi b'a kits'yún. ¹¹Kui b'a maha, tsa an ko tsa já postru xingisoo, én nda tsuu y'enijm̄i ko kui xi kis'ejinnuu.

B'i ts'ín tsakúya Pablo nk'ie nga kj'uaíya ngáha ra xuta xi ja k'ien

¹²Tunga tsa ni xi t̄is'enijm̄i nga j'áiya ngáha ra Cristo ngabayoo, ¿nkú ts'ín b'a t̄incha tsuhu k'ua xi t̄jín ajinnuu nga najmi ta kj'uaíyaha ra xuta xi ja k'ien? ¹³At'aha tsa najmi kj'uaíyaha xuta xi ja k'ien, ta ndaha Cristo najmi j'áiyaha ngabayoo ma. ¹⁴Ko tsa najmi j'áiyaha Cristo ngabayoo, kui xi tsuhu ra ma nga tu kjuandahá t̄ib'enijm̄i ko nga tu kjuandahá t̄is'ejinnuu éen. ¹⁵Tsa ni xi b'a t̄jihin ni, já tsank'á ní jin, at'aha najmi b'a t̄jín ni xi t̄ibixinyai. B'a t̄ixian at'aha jin tsixinyai nga Nt̄ianá kits'ínkj'áiyaha Cristo ngabayoo, tunga tsa najmi ta kj'uaíyaha ra xuta, kui xi tsuhu ra nga najmi j'áiyaha Cristo.

¹⁶At'aha tsa najmi ta kj'uaíya ngáha ra xuta xi ja k'ien, ta ndaha Cristo najmi j'áiyaha. ¹⁷Tsa najmi j'áiyaha Cristo ngabayoo, tu kjuandahá kis'ejinnuu ni xi kis'ejinnuu. Tu yje t̄intsubajih̄in so ngatitsunuu b'a. ¹⁸Ko ta ja kindyja xuta xi k'ien xi kis'ejih̄in Cristo. ¹⁹Tsa ni xi tu eih̄i asunntej̄i t̄ichuyáa ni xi sakúná at'aha s'ejinná Cristo, tu xí kintehé tsjéheén ngayjee xuta xi ta t̄jín asunntej̄i b'a.

²⁰Tunga j'áiya kjuaxih̄i ra Cristo ngabayoo. Kui xi nkú joyaha chan xi tjun xi 'bah̄i Nt̄ianá, at'aha kui xi tjun j'áiyaha ajih̄in xuta k'ien. ²¹At'aha xi nkú ts'ín ngat'aha ni xi kits'ihin nku nda j'aikjas'ehen ngabayoo, b'a ta ts'ín ngat'aha ni xi kits'ihin kj'ai nda kj'uaíyaha xuta ngabayoo. ²²Xi nkú ts'ín ngat'aha ni xi kits'ín Adan fesuhun ngayjee xuta, b'a ta ts'ín ngat'aha ni xi kits'ín Cristo n'ek'íentu t̄ik'un síhin ngayjee xuta.

²³Tunga f'áiyahá ra nga nkúnkú xi nkú ts'ín kanéhe. Tjun j'áiyaha Cristo ko askahan nk'ie nga kj'uaí ngáha kj'uaíyaha xuta xi ts'e.

²⁴Nk'iehé kuitjusunyje ni xi kama asunntee. Tjun ts'ínkje Cristo ngayjee xi batéxuma ko ngayjee xi t'jhin xá ko xi t'jhin nga'yún, ko askahan ts'ínkjas'en má batéxuma aya ntsja Nt'ianá xi Na'miná maha. ²⁵T'jhin nga kuatéxuma Cristo santaha nkúhu nga k'uéntu kinte sjai ngayjee xi t'fi kontraq. ²⁶Kontra xi k'fekuhu nga n'ekje, kui xi ngabayoo.

²⁷At'aha Nt'ianá kits'ínk'iéntu kinte sjai Cristo ngayjee ni xi t'jin. Tunga nk'ie nga b'a títu éhen Nt'ianá nga kin'ek'iéntu ngayjee ni xi t'jin kinte sjai Cristo, t'inchja chji chji nga najmi ko Nt'ianá xi t'jina kinte sjai Cristo, at'aha kui xi b'a kits'ín. ²⁸Nt'ianá kits'ínkjas'ehen aya ntsja Cristo ngayjee ni xi t'jin, ko nk'ie nga kits'ínk'iéntu Cristo ngayjee ni xi t'jin kinte sjai, as'ai ko ta Cristo xi Nt'ihí Nt'ianá ts'ínkjas'ehen yjoho Nt'ianá. B'a ts'ín Nt'ianá nkuhú kui kama ts'ehe ngayjee ni xi t'jin.

²⁹T'jin xi baténtá yjoho ngajoho xuta xi ja k'ien. Tunga tsa najmi kj'uaíyaha xuta xi ja k'ien, ¿á ngajoho xuta xu'bo incha baténtáha yjoho xi b'a ts'ín?

³⁰Ko jin, ¿á t'ín'ekj'áih'in ri ni ch'onk'un xi t'imat'ain tehenteheni?
³¹An bi, já nts'e, xki nist'jin t'ijnajih'in ngabayoo. Kjuaxi ni xi t'ixinnuu xi nkú ts'ín kjuaxi nga tsjo mana nga s'ejinnuu Nda Nt'ianá Jesucristo. ³²Nanki Efeso kis'ekona kjuasti já xi b'a ts'ín kjan xi nkúhu chu kjan, tunga tsa najmi ta kj'uaíya ngáha ra xuta xi ja k'ien, ¿mí nihi xi tsijnena nga b'a kits'ian? Tu sahá b'a n'eé xi nkú incha tsu k'ua já: "S'ia ko chineé, at'aha ndyjunní kuayáá."

³³Najmi tu 'bainto tsa t'jin xi k'uanachannuu. Yo nga b'a tsu én: "Xi tsjenko xuta xi ch'onk'un, ta ch'onk'un bitju." ³⁴N'ek'óntjaiyo kjuankjintak'unnuu ko najmi tu n'o ngatitsun. At'aha t'jin ajinnuu xi najmi be ni xi ts'e Nt'ianá. B'a t'ixinnuu tu xi kama subahannuu.

B'i ts'ín tsakúya Pablo nkú kama nk'ie nga kj'uaíya ngáha ra xuta xi ja k'ien

³⁵Kutsa t'jhin xi b'a kuitsu: "¿Nkú kama nk'ie nga kj'uaíya ngáha ra xuta k'ien? ¿Mí yjonintehe xi k'ua ngáha?"

³⁶Ji nda nchini xi b'a t'ibixín! Ni xi b'entjei najmi kuasu tsa najmi títjun kuayá. ³⁷Najmi ni xi stj'kj'oo b'entjei. Xujmá ní b'entjei, tsa xujmá tuniñu ko tsa kj'ái xujmá. ³⁸Nt'ianá tsjáha xujmóo yjoninte xi mjehe. Nga nkúnkú xujmóo tsjáha yjoninte xi kanéhe.

³⁹Najmi tu nku chuba yjoninte xi t'jin. Kj'ái k'un yjonintehe xuta ko kj'ái k'un xi ts'e chu. Kj'ái k'un ngá xi ts'e nisee ko ta kj'ái k'un xi ts'e tiu. ⁴⁰B'a ta ts'ín kj'ái k'un ni xi t'jin nk'a ján ko xi t'jin t'anankiu. Tsjo k'un xi t'jin nk'a ján ko tsjo k'un xi t'jin t'anankiu, tunga kj'ái kj'ái kjuatsjo xi t'jhin. ⁴¹Ts'íu kj'ái ts'ín bat'ai, ko sóo kj'ái ts'ín bat'ai, ko niñuu kj'ái ts'ín bat'ai ngá. Ko nga nkúnkú niñu xi t'jin kj'ái kj'ái ts'ín bat'ai.

⁴²B'a ta kama nk'ie nga kj'uaíyaha xuta ngabayoo. S'eyanji yjoninte xi maha batsun, tunga yjoninte xi kj'uaíya ngáha ra najmi ta kamaha ra kuatsúhun. ⁴³S'eyanji ni xi najmi chumi ni chjih̄i ra, tunga nk'ie nga kj'uaíya ngáha ra s'ehe kjuachánka. S'eyanji xi najmi tjih̄in nga'yún, tunga nk'ie nga kj'uaíya ngáha ra s'ehe nga'yún.

⁴⁴S'eyanji yjoninte xi kich'aá nd'ai, tunga kj'uaíya ngáha ra yjoninte xi Espirituhu Ntíaná k'uénda xi nkú ts'ín mjehe. Tsa tjin yjoninte xi nkúhu xi kich'aá, ko ta tjin ngá xi k'uénda Espirituhu Ntíaná.

⁴⁵B'a ts'ín tjit'a xujun éhen Ntíaná: “Nda xi tjuun kin'enda ko y'ejna tík'un.” Kui xi Adan. Tunga Adan xi fekuhu, xi Cristo, kui xi tsichu ma Espiritu xi ts'ínk'íentu tík'un xuta. ⁴⁶Tunga najmi kjuatík'un xi tsjáhá Espiritu xi tjun. Títjun ní kjuatík'un xi tsjá asunntej, askahan kjuatík'un xi tsjá Espiritu.

⁴⁷Nda xi tjuun ndyjo t'anankiu kin'endakoho, tunga nda xi ma joho ndjiojmi ján nibaha. ⁴⁸Xi nkú tjin nda xi kin'endakoho ndyjo t'anankiu, b'a ta k'un ngayjee xi ts'e t'anankiu. Ko xi nkú tjin nda xi nibaha ndjiojmi ján, b'a ta k'un ngayjee xi ts'e ndjiojmi ján. ⁴⁹Xi nkú ts'ín tjiyaná nd'ai xi nkúhu nda xi kamandakoho ndyjo t'anankiu, b'a ta ts'ín s'eyaná xi nkúhu nda xi kin'e nibáha ndjiojmi ján.

⁵⁰Jun já nts'e, tíxinyanu nga yjoninte xi kich'aá nd'ai najmi kama kjuas'enjin nga Ntíaná kuatéxumaha. Ta ndaha ni xi maha batsun najmi ma sakúntehe ajihin ni xi najmi maha batsun. ⁵¹Xinya manuu ni xi tijná 'maná. Najmi ngatenteé kuayáá, tunga ngatenteehé k'oóntjaiyaá. ⁵²Xi nkú ts'ín kitsa b'echjáá ko chjux'áá tunkaán, b'a ts'ín kitsa k'oóntjaiyaá nk'ie kjuane tjio xi fekuu. At'aha kjuane tjioo, as'ai kj'uaíyaha ngabayoo xuta xi ja k'ien tu xi najmi ta kuayá saha, ko ña ta k'oóntjaiyaá. ⁵³At'aha yjoninte xi kich'aá nd'ai xi maha batsun tjih̄in nga yjoninte xi najmi maha batsun kama. Yjonintená xi maha 'me nd'ai tjih̄in nga yjoninte xi najmi ta kuayáha kama.

⁵⁴Nk'ie nga yjonintená xi maha batsun kama yjoninte xi najmi maha batsun, ko nk'ie nga yjonintená xi maha 'me kama yjoninte xi najmi ta kuayáha, nk'iehé kuitjusun én xi tjit'a:

Ja kuan'ekje ngabayoo, ja kuan'e nganaha.

⁵⁵Ji ngabaya, ¿má ni nga kin'e nganai?

Ji ngabaya, ¿má ni nga'yún

xi n'ek'ienkohoni xuta?

⁵⁶At'aha ngabayoo ts'ínchjén ngatitsuun nga ts'ínk'ienkoho xuta, ko ngatitsuun ts'ínchjén kjuatéxumoo nga bakúchji ni xi 'mih̄i ngatitsuun. ⁵⁷Tunga máb'achjih̄i ra Ntíaná, kui xi tsjáná nga n'e nganaáha ngabayoo ngat'aha ni xi kits'ín Nda Ntíaná Jesucristo.

⁵⁸Kui b'a maha, já nts'ena xi 'yún tjona, ndjá tincho ko tjen nga'yúhuun yjonuu. Tehente tankínko ndju so xáha Nda Ntíaná. Yo nga najmi xá tiya tín'o nga Nda Ntíaná tín'exát'ohoo.

**B'ǐ ts'ín kitsúya Pablo nga n'esúhun
toon chje xuta ninku Jerusalen**

16 Máha ngat'a ts'e toon chje xi t́imasúhun xuta ninku Jerusalen, b'a ta n'oo xi nkú nga kixihín xuta ninku xi tj́ntu nanki xi tj́n ante Galaciá. ²Xi nkú tj́n mahanu, xki tuminku t'ejña t'axiún ichí toon nga nkúnkú. Xi nkú tj́n sakúnuu, b'a tj́n t'ejña t'axiún. Ch'atj́o tooon tu xi nk'ie nga kuichusehenuu najmi tj́hin nga chj'asúhun toon chje.

³Nk'ie nga kuicha yo ts'inkj́a nanki Jerusalen xuta xi jun chj'ajjun ko tsjahá xujun má nga an t́b'exá, tu xi ngjuai_koho ra toon xi kin'esúun xuta ninku xi tj́n ján. ⁴Tsa nda tj́n nga ko an kfián yo, ta ts'inka niyá jóo.

B'ǐ ts'ín kitsúya Pablo ni xi tj́ndaha nga ts'íin

⁵Kfínsenuu, tunga nk'iehé nga kj'ua ante Macedonia kfínsenuu, at'aha tj́hin nga kj'ua nanki xi tj́n yo. ⁶Kutsa nkjihín nistjin kúátejñajinnuu nga kuicha yo. Kutsa yohó ts'inkj'a nistjin chunch'oon, tu xi b'a ts'ín kama kuiskohonó má xi tjeheh kfián ngáhana askahan. ⁷At'aha najmi mjena tsa tu skuehénuu nga kj'ua yo. Mje nína nkjin nistjin kúátejñajinnuu. B'a ts'ian tsa Ntíaná tsjántena. ⁸Tunga kúátejñaná nanki Efeso santaha nkúhu nga kuichú S'í Pentekoste, ⁹at'aha sakúntena nga ts'inxá sisian, ndaha tsa nkjin maha xi fi kontraqa ni xi t́ts'ian.

¹⁰Tsa kuichúsenuu Timoteo yo, nda n'e n'ekjóhoon tu xi tsjo k'úéhe ra nga k'úéjñajinnuu. At'aha ta xáha Nda Ntíaná t́ts'ín xi nkúhu an. ¹¹Kui nga najmi tu 'bainto tsa tj́n xi tu tohón kamaha ndo. Tu sa ní tisinkoo tu xi nda ts'ín kats'ínndjuúhu niyáha nga kj'uaísehena ei. Kas'ehe kjuajyu nga kanibá, at'aha t́kuyá nga kj'uaíko já nts'eé xingisoo.

¹²Máha nda nts'eé Apolo, b'a kixin nkjúhun nga ngjuai_ko já nts'eé xi ngjuaitsubek'únnuu, tunga najmi kits'ín yuhú nga nd'ai ngjuai. Nk'ie rú nga sakúntehe, nk'ie rú nga ngjuai.

B'ǐ ts'ín kits'ínkje Pablo xujun

¹³Tintsuba ndo ko ndj́a t́inchajun xi s'ejinná. Ndj́a n'esjo yjonuu ko tjen nga'yúhuun yjonuu. ¹⁴Ngayjee ni xi n'ekoo xinkiu, katakúchji kjuatjonuu.

¹⁵Jun já nts'e, yo nga xuta xinkj́n nda Estefana tjun kits'ínkjáihín éhen Ntíaná ajihín xuta xi tj́n ante Akaya ko kitsjáha yjoho nga t́incha basinko xuta ninku. ¹⁶Tíbankinuu nga tasinnjuhúu xuta xi b'a k'un xi nkúhu xuta xu'bi ko ngayjee xi ta kuihi xá xi ts'ín ko xi ts'ínkjas'ehen yjoho xoo.

¹⁷Tsjo mana nga j'aisena Estefana ko Fortunato ko Akaike, at'aha ngajonuu incha tsasinkona. ¹⁸Kits'ın nga kikjenta animana xi nkú nga ta kits'ın ajinnuu. Xuta xi nkúhu xu'bi kayaha nga nda nkjún xá xi ts'ın.

¹⁹Títs'ınkjinuu kjuasuniña xuta ninku xi tjin ante Asia. Akila ko Priscila ko ngayjee xuta ninku xi ma njakú ni'yaha 'yún títs'ınkjinuu kjuasuniña jun xi ta s'ejinnuu Nda Ntiana. ²⁰Ko ngayjee já nts'eé xi tjin ei títs'ınkjinuu kjuasuniña. B'i ngján súniñoohoo xinkiu.

²¹An Pablo ntuna tıb'et'áhanuu kjuasuniñana.

²²Tsa tjin xi najmi tjoho Nda Ntiana Jesucristo, kui najmi nda katuma nginkun Ntiana. ¡Nibái Nda Ntia!

²³Kas'enuu kjuandaha Nda Ntiana Jesucristo. ²⁴Tjona ngatentoo jun xi nkú ts'ın Cristo Jesu tjoho ñá.